

太原府志

册四十



太原府志卷三十五

人物二

唐

王珪字叔玠祁縣人僧辨之孫也父顓北齊樂陵郡太守居郿珪性沈澹志量隱正恬於所遇交不苟合隋開皇十三年召入秘書內省讎定羣書爲太常治禮郎季父頽尤所器許高祖入關李綱薦署世子府諮議叅軍事尋授中舍人遷中允禮遇良厚建成與秦王有隙上責珪不能輔導流雋州建成敗太宗召爲諫議大夫推誠納善每存規益上益任之封永寧縣男黃門侍郎遷侍中他日進見有美人侍側上指之曰此廬江王瑗賊其夫而納其室者也珪避席曰陛下以廬江爲是邪非邪

太原府志

卷三十五

人物

一

上曰殺人而取妻乃問朕是非何也對曰昔齊桓公問郭父老曰郭何故亾曰以其善善而惡惡也公曰此乃賢君也何至於亾父老曰郭君善善不能用惡惡不能去所以亾今陛下知廬江之亾其姬尚在所謂知惡而不去也上嗟美其言太常少卿祖孝孫數被讓珪與溫彥博同進曰孝孫修謹士今使教女樂又責譙之天下其以士爲輕乎上怒曰卿皆我腹心乃附下罔上爲人游說邪彥博懼謝罪珪不謝曰臣本事前宮罪當死陛下矜其性命引置樞密責以忠效今疑臣以私是陛下負臣臣不負陛下上默然明日語房元齡曰朕昨責珪等痛自悔公等勿懲是不廷諫也時珪與元齡李靖溫彥博戴胄魏徵同輔政上謂珪曰卿標鑒通悟爲朕言



元齡等材且自謂孰與諸子賢對曰孜孜奉國知無不爲臣不如元齡兼資文武出將入相臣不如靖敷奏詳明出納惟允臣不如彥博理繁治劇衆務畢舉臣不如胄以諫諍爲心恥君不及堯舜臣不如徵至激濁揚清疾惡好善臣於數子有一日之長上稱善而元齡等亦以爲盡己所長謂之確論進封郡公坐漏語除同州刺史俄召拜禮部尚書兼魏王泰師王嘗先拜珪亦以師自居勉以忠孝上聞喜曰兒可以無過矣子敬直尚南平公主時諸主下嫁未嘗行見舅姑禮珪曰吾當受公主謁見豈爲身榮將以成國家之美於是與夫人坐堂上主執筭盥饋乃退其後公主備婦禮本於珪十三年病卒年六十九贈吏部尚書諡曰懿敬直封南城縣男

太原府志

卷三十五

人物

二

坐交太子承乾徙嶺外珪孫燾見孝義傳

溫大雅字彥宏并州祁人父君攸北齊文林館學士入隋爲泗州司馬隋政亂謝病歸大雅性至孝與弟彥博大有皆知名薛道衡見之歎曰三人者皆卿相才也初爲東宮學士長安尉父喪歸不復仕高祖鎮太原厚禮之兵興引爲大將軍府記室參軍主文檄唐初討定儀典遷黃門侍郎而彥博亦爲中書侍郎對管華近上嘗從容謂曰我起晉陽爲卿一門耳進工部侍郎陝東道大行臺尚書秦王表鎮洛陽王卽位轉禮部封黎國公卒諡曰孝永徽五年贈尚書右僕射

溫彥博字大臨大雅之弟也通書記警悟而辨開皇末對策高第授文林郎直內史省幽州總管羅藝引爲司馬



藝以州降唐授總管府長史封西河郡公召入爲中書舍人遷侍郎高麗貢方物高祖欲讓而不臣彥博曰遼東本周箕子國漢元菟郡不使北面則四夷何所瞻仰納之突厥入以并州道行軍長史戰太谷師敗被執突厥數問唐兵多少及國虛實彥博不肯對囚陰山苦寒地太宗初得還授雍州治中尋檢校吏部侍郎遷御史大夫檢校中書侍郎事貞觀四年遷中書令封虞國公彥博善辭令每問四方風俗臚布詰命若成誦然進止詳華人皆拭目觀高祖嘗宴近臣遣秦王諭旨旣而顧曰何如溫彥博十年遷尚書右僕射明年卒年六十三彥博性周慎旣掌機務謝賓客進見必陳政事利害卒後上歎曰彥博以憂國故耗思殫神我見其不逮再期

太原府志

卷三十五

人物

三

矣恨不許少閒以究其壽家貧無正寢殯別室命有司爲構寢贈特進諡曰恭陪葬昭陵子振挺振見孝義傳挺尚千金公主官延州刺史彥博曾孫曦尚涼國長公主

溫大有字彥將彥博之弟也隋仁壽中李綱薦之授羽林騎尉高祖引爲太原令從徇西河高祖曰士馬單少要須經畧以君參軍事事之濟否卜是行也西河下攝大將軍府記室與兄大雅同掌機近請徙他職上曰我虛心待卿何所自疑武德初累遷中書侍郎封清河郡公卒贈鴻臚卿諡曰敬

唐儉字茂約并州晉陽人邕之孫也父鑒隋戎州刺史嘗偕高祖典軍衛故儉雅善秦王儉爽邁事親以孝聞隋



政亂陰說秦王建大計又進說於高祖及大將軍府關授記室參軍渭北道元帥司馬從定關中爲相國府記室晉昌郡公武德初進內史舍人遷中書侍郎散騎常侍以使爲劉武周所擒儉密遣劉世讓歸白發蒲守獨孤懷恩反謀會高祖幸蒲津舟及中流而世讓至上驚曰豈非天也命趨還舟捕反者懷恩自殺俄而武周敗亾儉封府庫籍兵甲以待秦王上嘉儉身雖幽辱而不忘朝廷諂復舊官仍爲并州道安撫大使還爲禮部尚書天策府長史檢校黃門侍郎莒國公仍爲遂州都督貞觀初使突厥四年復馳傳往誘使歸欵頡利許之兵懈弛李靖因襲破之儉脫身還歲餘爲民部尚書從獵洛陽苑上射四發輒殪四豕一豕躍及鐙儉投馬搏之

太原府志

卷三十五

人物

四

諫曰陛下神武定四方豈復快心於一獸上爲罷獵詔其子善識尚豫章公主坐小法貶光祿大夫永徽初致仕加特進顯慶初卒年七十八贈開府儀同三司并州都督陪葬昭陵謚曰襄少子觀爲河西令知名孫從心神龍中擢殿中監

唐憲字茂彞儉弟仕隋東宮左勳衛罷歸高祖頗親遇之參與大議義師起授正議大夫置左右封安富縣公武德中累進雲麾將軍加郡公貞觀中終金紫光祿大夫唐次字文編憲裔孫建中初及進士第歷侍御史竇參數薦之改禮部員外郎參貶出爲開州刺史十年不遷韋臯鎮蜀表爲副使德宗諭臯罷之次自以身遠朝廷采古忠臣賢士罹讒被放者爲辨謗略三篇上之帝益怒



改夔州刺史憲宗立召還授禮部郎中知制誥終中書舍人憲宗嘗覽辨謗畧善之謂學士沈傳師曰凡君人者宜所觀省然次編錄未盡卿可廣其書傳師等增爲十篇更號元和辨謗畧

唐扶字雲翔次子歷侍御史屯田郎中太和五年爲山南宣撫使內鄉倉督鄧琬負度支漕米責繫二十八年父子至孫凡九人死於獄扶奏申釋之詔切責鹽鐵度支二使天下逋繫三年以上者皆原進中書舍人出爲福州觀察使

唐持字德守扶弟中進士第太和中爲渭南尉試京兆府進士尹杜棕欲以親故託之持輒降階伏棕語塞乃止累遷工部郎中出爲容州刺史遷給事中歷朔方昭義

太原府志

卷三十五

人物

五

節度使卒

劉義節本名世龍并州人隋大業末補晉陽鄉長富於財裴寂薦之唐公又與王威高君雅遊然於唐公最厚兵將起威君雅疑之義節刺知其情得先事擒威等從平關中爲鴻臚卿遷太府封葛國公高祖賜今名太宗定功臣封義節六百戶貞觀初轉少府坐事徙嶺南

趙文恪并州人爲隋鷹揚府司馬義兵起授右三統軍武德二年擢都水監封新興郡公論太原首功與長孫順德等十四人俱恕一死會詔文恪至并州市馬齊王使率步騎千餘助李仲文守涪州劉武周兵至棄城下獄卒

許世緒并州人隋鷹揚府司馬親於唐公兵起授右一府



司馬累除蔡州刺史封真定郡公卒

許洛仁世緒弟亦從起晉陽錄功至冠軍大將軍卒贈代州都督謚曰勇陪葬昭陵

秦行師并州人右監門將軍清水郡公定功封三百戶  
龐卿憚并州人從討隱太子有功拜右驍衛將軍邾國公  
定功封四百戶卒追改濮國子同善右金吾大將軍同  
善子承宗開元初太子賓客

辛異本衛人隋文帝時避仇徙榆次大姓鞠氏見而奇之  
妻以女致貲累萬值大業末人饑異出穀數千賑施邑  
中其妻謂曰天下方亂丈夫不因時取功名乃安坐鄉  
里乎異曰吾心也顧未見可適者乃去謁楊元感決其  
無成復歸太原後從唐高祖起義兵軍用不足異毀產

太原府志

卷三十五

人物

六

以資行師武德中累功爲千牛衛將軍突厥爲邊患以  
異爲夏州刺史禦之有惠政遷雲中都督卒

王方翼字仲翔并州祁人祖裕尚同安大長公主官開府  
儀同三司卒謚曰文方翼早孤哀毀如成人時號孝童  
母李爲主所斥居鳳泉墅方翼尚幼雜庸保執苦主薨  
還京太宗擢右千牛高宗立后爲方翼從祖女弟調安  
定令居母喪哀瘠甚上遣侍醫療視其友趙持滿誅尸  
諸市方翼往哭其尸具禮收葬金吾劾繫上嘉之不罪  
再遷肅州刺史州無隍澗方翼發卒建樓堞引水自環  
烽邏精明儀鳳間蝗獨不至境他郡民皆重繭走治下  
乃出私錢作水磴薄其贏以濟饑療構舍數十百楹居  
之全活甚衆芝產其地裴行儉討遮旬奏爲副兼檢校



安西都護策碎葉城面三門紆還多趣以詭出入五旬  
畢西域人縱觀莫測其方思悉獻珍貨徙庭州刺史以  
杜懷寶鎮安西失蕃戎和永淳初十姓阿史那車薄噉  
叛圍弓月城方翼引軍戰伊麗河敗之斬首千級俄而  
三姓咽麪兵十萬踵至方翼次熱海進戰矢著臂引佩  
刀斷去左右莫知所部謀執方翼爲內應方翼悉召會  
軍中厚賜以次出壁外縛誅之卽遣騎分道襲咽麪等  
皆驚潰擒首領突騎施等三百人西域平以功遷夏州  
都督明年召見奉天宮具對熱海苦戰狀視其創上咨  
嗟久之賜賚良厚妖人白鐵余反綏州方翼討平之封  
太原郡公阿史那元珍入寇時庫無完鎧方翼斷六板  
畫虎文鉤聯解合賊馬忽見奔駭遂敗獲大將二因降

太原府志

卷三十五

人物

七

桑乾舍利二部武后時以王后屬流崖州卒於道年六  
十三神龍初復官爵方翼善書與魏叔琬齊名子三人  
璵珣璿見文苑傳

狄仁傑字懷英并州太原人祖孝緒貞觀中尚書左丞父  
知遜夔州長史仁傑爲兒時門人有被事者吏就詰衆  
爭辨仁傑誦書不置吏讓之答曰黃卷中方與聖賢對  
何暇偶俗吏語邪舉明經調汴州參軍閭立本薦授并  
州法曹參軍親在河陽仁傑登太行反顧見白雲孤飛  
謂左右曰吾親舍其下停立久之雲移乃去同府參軍  
鄭崇質母老且疾當使絕域仁傑詣長史蘭仁基請代  
行仁基時方與司馬李孝廉不平相語曰吾等可少媿  
矣則相待如初每日狄公之賢北斗以南一人而已稍



遷大理寺丞歲中斷久獄萬七千人時稱平恕尋授侍御史遷度支郎中出爲寧州刺史入拜冬官侍郎持節江南安撫使禁止淫祠凡毀千七百所唯畱夏禹吳泰伯季札伍員四祠而已轉文昌右丞出爲豫州刺史天授二年以地官侍郎同鳳閣鸞臺平章事爲來俊臣誣搆下獄時一問卽承者例得減死俊臣逼脅使承仁傑歎曰大周革命萬物維新唐朝舊臣甘從誅戮反是實俊臣乃少寬之其屬王德壽以情謂曰我意求少遷公爲我引楊執柔爲黨公且免死仁傑曰皇天后土使仁傑爲此乎以首觸柱血流沫面德壽懼而謝守者寢弛乃書帛置褚衣中付家子光遠得書上變后以問俊臣俊臣曰仁傑不免冠帶寢處甚安何由伏罪后遣使案

視俊臣遽命仁傑巾帶而見使者且令德壽代作謝死表后乃召見仁傑謂曰承反何也對曰不承死咎掠矣示其表曰無之后知其代署也因免死時同被誣者鳳閣侍郎任知古等七族悉得貸仁傑貶彭澤令邑人爲置生祠萬歲通天中擢爲魏州刺史轉幽州都督賜紫袍龜帶后自製金字十二於袍以旌其忠召拜鸞臺侍郎復同平章事時發兵戍疏勒仁傑上疏諫又請廢安東復高氏爲君省江南轉饜不納張易之嘗從容問自安計仁傑曰惟勸迎廬陵王可以免禍會后欲以武三思爲太子以問宰相衆莫敢對仁傑曰臣觀天人未厭唐德比寇犯邊使梁王三思募勇士於市踰月不及千人廬陵王代之不浹日輒五萬今欲繼統非廬陵王莫



可后怒罷議久之名謂曰朕數夢雙陸不勝何也對曰  
雙陸不勝無子也天其意之以儆陛下乎文皇帝身蹈  
鋒鏑勤勞而有天下傳之子孫先帝詔陛下監國陛下  
掩神器而取之十有餘年又欲以三思爲後且姑姪與  
子母孰親陛下立廬陵王則千秋萬歲後常享宗廟三  
思立廟不祔姑后感悟卽日遣徐彥伯迎廬陵王於房  
州王至后匿帳中召見仁傑語廬陵事仁傑敷奏切至  
涕下不能止后乃使王出曰還爾太子仁傑降拜頓首  
曰太子歸未有知者人言紛紛何所信后乃更令太子  
舍龍門具禮迎中外大悅尋拜納言兼右肅政御史大  
夫突厥入詔仁傑爲河北道行軍元帥總兵十萬追之  
不及更拜河北安撫大使時民多脅從於寇懼誅逃匿  
太原府志

卷三十五

人物

九

仁傑上疏請曲赦河北詔從之還除內使眷禮殊絕聖  
歷三年九月病卒年七十一后廢朝三日贈文昌右相  
謚曰文惠中宗追贈司空睿宗追封梁國公仁傑始居  
母喪有白鵲馴擾之異其所薦進若張柬之桓彥範敬  
暉姚崇等皆爲名臣

狄光嗣仁傑子聖歷初爲司府丞詔宰相舉尚書郎一人  
仁傑薦光嗣拜地官員外郎以稱職聞后喜曰祁奚內  
舉果得其人歷淄計貝三州刺史母喪奪爲太府少卿  
固讓睿宗嘉其誠許之累遷揚州長史貶歙州別駕卒  
狄兼謨字汝諧仁傑族孫及進士第辟襄陽使府剛正有  
祖風令狐楚薦授左拾遺數言事歷刑部郎中勸鄧鄭  
三州刺史歲旱饑發粟賑民徙蘇州以治最擢給事中



左藏史盜度支縑帛詔勿治兼謨封還詔書曰典吏犯  
贓不可免文宗曰朕已赦之長官吏亦宜宥與其失信  
寧失罪人既而曰後或事有不可勿以還詔為憚遷御  
史中丞上曰卿梁公後當嗣家聲不可不慎兼謨頓首  
謝歷兵部侍郎河東節度使辭疾以秘書監歸洛陽遷  
東都留守卒

王仁皎字鳴鶴太原祁人元宗廢后父也景龍中以將帥  
舉授甘泉府果毅遷左衛中郎將以后故擢將作大匠  
累進開府儀同三司封祁國公仁皎避職不事委遠名  
譽卒年六十九贈太尉益州大都督諡昭宣子守一與  
后學生尚青陽公主從討太平王有功累進太子少保  
襲父爵后廢貶死

太原府志

卷三十五

人物

十

李希靖文水人明經積學言動恒以禮自檢神龍初以進  
士拜監察御史正色立朝直言敢諫當時畏其風采雖  
諸武擅權希靖不為屈然性嚴厲不諧於俗故不大顯  
子愷

李愷希靖子少秀敏舉明經高第授成安尉母喪免自武  
功尉以政尤異遷主簿張說在并州引置幕府及執政  
以為長安尉字文融括天下田表假監察御史分道檢  
覈以課真拜御史坐小累下除晉陽令三遷給事中力  
於治有任事稱失李林甫意出為河南少尹尹蕭炅倚  
權翫法愷裁抑其謬吏下賴之天寶初除清河太守舉  
美政遷廣陵長史民為立祠徙彭城太守封酒泉縣侯  
連徙襄陽河東並兼採訪處置使入為京兆尹楊國忠



惡之改光祿卿東京留守封常清募兵東京愷與留臺御史中丞盧奕河南尹達珣珣繕城壘緩勵士卒將遏賊西鋒帝聞擢禮部尚書祿山薄城下常清兵戰不勝輒北愷收殘士數百哀斷弦折矢堅守人不堪鬪愷約奕吾曹荷國重寄雖力不敵當死官部校皆夜縋去愷坐畱守府奕守臺城陷祿山鼓而入殺數千人執愷奕及官屬蔣清害之詔贈司徒諡曰忠懿河洛平再贈太尉拜一子五品官子江涵瀾瀛等同遇害唯源彭得脫源見孝義傳

李彭文水人愷子擢明經第天寶中選名臣子可用者自咸寧丞遷右補闕從入蜀後愷數年卒孫景讓景莊景溫

太原府志

卷三十五 人物

十一

李景讓字後已彭之孫也父宏仕不顯景讓性方毅有守寶歷初遷右拾遺淮南節度使王播以錢十萬求領鹽鐵景讓詣延英亟論不可遂知名沈傅師觀察江西表以自副歷中書舍人禮部侍郎商華虢三州刺史拜右散騎常侍出為浙西觀察使入為尚書左丞拜天平節度使徙山南東道封酒泉縣男大中中進御史大夫甫視事劾免侍御史孫玉汝監察御史盧侑威肅當朝為大夫三月蔣伸輔政見宰相自陳考深當代即拜西川節度使以病丐致仕或諫景讓無素儲不為諸子謀耶景讓笑曰兒曹詎餓死乎書聞輒還東都以太子少保分司卒年七十二贈太子少保諡曰孝景讓好獎士類拔孤仄如李蔚楊知退皆所推引始為左丞蔣伸坐宴



所酌酒語客曰有孝於家忠於國者飲此客肅然景讓起卒爵伸曰無宜於公性詩素寡欲門無雜賓李琢罷浙西以同里訪之避不見及去命斲其騙石焉元和後大臣有德望者以居里顯景讓宅東都樂和里世稱清德號樂和李公云

李景溫字德己景讓弟歷諫議大夫福建觀察使徙華州刺史以美政聞累遷尚書右丞盧攜當國弟隱由博士遷水部員外郎材下資淺人無敢繩景溫不許赴省時故事久廢景溫旣舉職人皆躉其正弟景莊亦至顯官王海賓太原祁人家華州之鄭縣爲太子右衛率豐安軍使太谷男以驍勇聞隴上開元二年吐蕃寇隴右防禦使薛訥以海賓爲先鋒戰於武階驛殺獲甚衆進戰長

太原府志

卷三十五

人物

十一

城堡諸將媚其功按兵顧望海賓戰死大軍乘之斬首萬七千級獲馬七萬五千牛羊十四萬元宗聞而憐之詔贈左金吾大將軍開元十八年再贈安西大都護

王忠嗣海賓子初名訓年九歲而孤授尚輦奉御入見伏地號泣上撫之曰此去病孤也須壯而將之更賜今名養禁中使與忠王游試守代州別駕數以輕騎出塞忠王白忠嗣敢鬪恐亾之由是召還信安王禕在河東蕭嵩出河西數引爲麾下以其年少有復讎志詔不得特將嵩入朝忠嗣請精銳數百襲寇會贊普大酋閱武鬱標川其下欲還忠嗣不從提刀略陣斬數千人獲牛馬萬計嵩上其功上大悅累遷左威衛將軍代北都督封清源縣男皇甫惟明構之貶東陽府左果毅河西節



度使杜希望欲取吐蕃新羅城薦忠嗣才詔追赴河西  
進拔其城錄功多授左威兩郎將專知兵馬俄吐蕃大  
出晨壓官軍陣衆不敵軍恐忠嗣乃以所部策馬進左  
右馳突當者無不辟易出而復合殺數百人賊衆囂三  
軍翼而擊之寇大敗拜左金吾衛將軍領河東節度副  
使大同軍使尋爲節度使二十九年節度朔方兼靈州  
都督天寶元年北討奚奴背戰桑乾河三遇三克耀武  
漠北高會而還時突厥有內難忠嗣進軍磧口經略之  
烏蘇米施可汗請降忠嗣知其詐乃營木刺蘭山謀虛  
實因上平戎十八策縱反間於拔悉密與葛邏祿回紇  
三部攻多羅斯城涉昆水斬米施築大同靜邊二城徙  
清塞橫野軍實之併受降振武爲一城自是寇不敢盜

塞徙河東節度使進封縣公俄爲河西隴右節度使權  
朔方河東節度佩四將印又授一子五品官後數出戰  
青海積石寇輒奔破又討吐谷渾於墨離平其國乃固  
讓朔方河東二節度許之時方事石堡城詔問攻取計  
忠嗣奏吐蕃舉國守之若頓兵堅城下費士數萬然後  
可圖恐所得不讎所失請待釁取之上不悅李林甫尤  
忌其功日鈎撫過咎六年會董延光請下石堡詔分兵  
應接忠嗣不得已爲出軍而士無賞格河西兵馬使李  
光弼入說曰大夫愛惜士卒雖名受詔實奪其謀有如  
不捷歸罪大夫大夫先受禍矣忠嗣曰吾固審得一城  
不足制敵失之未害於國言忍以數萬人命易一官哉  
明日見責不失一金吾羽林將軍歸宿衛否則黔中上



佐耳光弼謝曰大夫行古人事光弼又何言延光過期不克果訴忠嗣沮兵又安祿山城雄武扼飛狐塞請忠嗣助役因欲留其兵忠嗣先期至不見祿山而還數上言祿山且亂林甫益惡之陰使人誣告忠嗣欲奉太子上怒召入論死哥舒翰請以官爵贖忠嗣罪上意解十一月貶漢陽太守七年量移漢東郡明年暴卒年四十五後翰引兵攻石堡拔之死亾略盡如忠嗣言故當世號爲名將寶應元年追贈兵部尚書

王難得太原人父思敬少從軍累官太子賓客難得有勇決善騎射天寶初爲河源軍使吐蕃贊普王子郎支都有勇乘諸真馬寶鈿裝鞍出陣求鬪無敢與校者難得挾槍奮馬突前刺殺郎支都軍還元宗召見令於殿前

太原府志

卷三十五

人物

十四

乘馬挾槍作刺郎支都狀賜以錦袍金帶累拜金吾將軍同正員天寶七載從哥舒翰擊吐蕃於積石虜吐谷渾王子悉弄叅及子塔悉頰藏而還累拜左武衛將軍關西遊奕使九載擊吐蕃收五橋拔樹敦城補白水軍使十三載從收九曲加特進祿山之叛從哥舒翰戰於潼關關門不守從肅宗幸靈武時行在闕軍賞難得進絹三千疋及金銀器等至德初試衛尉卿興平軍使兼鳳翔都知兵馬使進收京城與賊軍戰其下斬元曜戰酣墮馬難得馳救之賊射之中眉皮穿披下鄣目難得自拔去箭并皮掣落馳馬復戰血流被面而抗賊不已肅宗深嘉之從郭子儀攻女慶緒於相州累封琅琊郡公英武軍使寶應二年卒贈潞州大都督憲宗立以莊



憲皇太后祖贈太尉思敬贈司徒

王子顏難得子少從父征役官金紫光祿大夫檢校衛尉卿實生莊憲皇后贈太師子重榮官至福王傳重榮弟用

王用字師柔莊憲皇太后之弟元和元年憲宗朝太后南宮於時太后昆弟惟用在特拜銀青光祿大夫太子詹事上柱國封太原郡公轉少府監太子賓客遷左散騎常侍金吾大將軍能以禮法自持敬讓而敏元和十一年秋將以八月葬莊憲皇后先一月用卒贈工部尚書韓愈特為右庶子作銘辭曰卑躬慎德

莊憲為順宗妃未及冊為后而為太上皇后順宗崩尊為皇太后史稱其有古后妃風抑損外家毫髮不

太原府志

卷三十五

人物

十五

假借而用之賢亦外戚所少昌黎云太后昆弟惟用

一人則重榮福王傳亦贈官也人則太原人封故太

原公莊憲之為太原無疑者當以昌黎之言為正

石義奮本幽州人父昭立天寶末安祿山反挈其子奔太

原遂為榆次人義奮善書數能挽強擊劍常遊河北朱

滔客之滔將反以義奮才而有謀欲引居腹心義奮諫

曰自古無亂臣賊子能全身家者公自視與安史如何

安史負恩背德甘蹈兇逆未幾誅夷天下醜恨公必毋

蹈其轍滔怒囚之守者哀其義陰使逃去變姓名為王

武俊小吏久之武俊覺焉武俊故陽結滔陰持兩端呼

義奮試問今日事義奮為塚古忠臣與奸逆究竟勸速

絕滔武俊雖不能用然意已動及李抱真結武俊奉天



子武俊卒聽約義奮後爲岐山尉至比部郎中

王端太原人天寶間進士有石與柳芳陸據殷寅友善據嘗言端之莊芳之辨寅之介可以名世終工部員外郎子紹

王紹端子自太原徙京兆之萬年少爲顏真卿所器字之曰德素奏爲武康尉再佐蕭復府包佶領租庸鹽鐵使署爲判官時李希烈阻兵江淮餉道梗紹督輕貨趣間道走洋州見德宗行在上勞之曰吾軍乏春服朕且衣裘奈何紹流涕曰佶遣臣貢奉無慮五十萬當卽至後五日果至上悅遷倉部員外郎時收闕官俸稅茶及無名錢以修荒政紹遷戶部郎中判務專領進戶部侍郎判度支頃之遷尚書性謹密眷待殊厚主計凡八年每

太原府志

卷三十五

人物

六

政事多所關訪紹亦未嘗一言漏於人順宗立王叔文奪其權拜兵部尚書出爲東都留守元和初檢校尚書右僕射爲武寧軍節度使蒐輯軍政推誠示人裨將安進達唐重靖謀亂紹以計取之出家賞賞士舉軍安賴復拜兵部尚書判戶部卒年七十二贈右僕射諡曰敬王翊并州晉陽人翊之兄也性謙柔淡於聲利歷山南東道節度使入朝充北蕃宣慰使稱職代宗目爲純臣遷刑部侍郎御史中丞以謹重知名卒贈戶部尚書諡曰忠惠

王翊字宏肱并州晉陽人少治兵家天寶中授衛尉羽林軍宿衛擢才兼文武科出爲辰州刺史與討襄州康楚元有功加兼秘書少監遷朗州刺史大歷五年擢容管



經畧使初夷酋梁崇牽號平南都統與別帥覃問合又與西原賊張俟夏承更誘煽遂據容州前經畧使陳仁琇元結長孫全緒等皆僑治藤梧翊曰我容州刺史安可客治他所必得容乃止卽出私財募士有功者許署吏於是人自奮不數月斬賊帥歐陽珪因至廣州請節度使李勉出兵併力勉不許翊曰大夫卽不出師願下書州縣陽言以兵爲助冀借此聲成萬一功勉許諾翊乃移書義藤二州約皆進討引兵三千與賊鏖戰日數遇勉檄止之翊慮惑將士匿其牒戰愈力卒破賊擒崇牽悉復容州故地凡百餘戰擒首領七十覃問遁去復遣將李實等分討西原平鬱林諸州間乘間來襲翊設伏擊之生擒問嶺表平上遣使慰勞加金紫光祿大夫

賜第京師時吐蕃入寇郭子儀悉河中兵乘邊爲河中少尹領節度後務悍將凌正約其徒夜斬關逐翊翊覺之陰亂漏刻以差其期衆不敢發俄擒正誅之歷汾州刺史爲振武軍使綏銀等州畱後入拜京兆尹會涇原兵叛翊時主供頓奔至奉天拜太子詹事再遷大理卿出爲福建觀察使徙東都畱守開田二十餘屯市勁勩良鐵以爲兵器簡練士卒號令精明俄而吳少誠叛獨東畿有備關東賴之貞元十八年卒時七十餘贈尚書右僕射謚曰肅

王正准字光謙翊之子少以孝行修謹聞元和初登進士甲科累從職使府拜監察御史穆宗時爲萬年令抑強扶弱政甚有聲上命以緋衣銀章就縣宣賜遷戶部郎



知臺雜事再遷太常少卿出爲汝州刺史中人爲監軍  
怙權正雅謝病去入爲大司馬卿會宋申錫事起獄自內  
出卒無證驗於時王守澄之威權鄭注之寵勢雖宰相  
重臣無敢顯言其事者唯正雅與京兆尹崔綰上疏請  
出造事者付外考驗別具狀聞由是獄情稍緩申錫止  
於貶官中外翕然推重之太和五年十一月卒贈左散  
騎常侍

王凝字致平翊曾孫也翊生重河東令重生衆仲登進士  
第官衡州刺史衆仲生凝少孤年十五兩經擢第常著  
京城六岡銘爲文士所稱再登進士甲科爲鄆縣尉集  
賢校理累遷司封郎中中書舍人時政不協出爲同州  
刺史賜金紫移疾歸華州踰年以禮部侍郎徵旋出爲

太原府志

卷三十五

人物

六

商州刺史入爲兵部侍郎領鹽鐵轉運使不奉權倖坐  
舉非其人以秘書監分司東都卽拜河南尹遷檢校禮  
部尚書宣歙池觀察使乾符五年黃巢大掠淮南攻圍  
和州凝令牙將樊儁率師據采石以援之儁犯令凝斬  
以徇命別將烏穎代儁赴援竟解歷陽之圍賊怒引衆  
攻宣城大將王涓請出軍逆戰凝曰賊忿恚而來宜持  
重待之彼衆我寡萬一不捷則州城危矣涓銳意請行  
凝遂閱集丁壯分守要害登陴設備涓果戰死賊乘勝  
而來則守有備矣賊爲梯衝之具急攻數月不克而退  
其年夏疾甚有大星墜於正寢八月卒於郡時年五十  
八姪鉅至兵部侍郎

王緯字文卿并州太原人父之咸長安尉與弟之賁之負



皆有文緯舉明經以書判入等歷長安尉大歷中與李  
泌俱爲路嗣恭江西觀察判官嗣恭希元載意欲殺泌  
緯護解僅免泌執政奏於已有私恩德宗許爲報進緯  
給事中浙西觀察使缺泌以緯薦上曰是朕爲君報德  
者乎黃門要地獨不留議事邪對曰浙西賦入尤劇緯  
清而忠能惠養民故請遣之制可州縣有韓滉時罰錢  
未入者十八萬緡府吏請哀爲進奉緯上疏願蠲以紓  
民詔聽之貞元十年加御史大夫兼諸道鹽鐵轉運使  
裴延齡以諸道負錢四百萬緡獻爲羨錢緯奏此諸州  
經費大忤延齡意改檢校工部尚書卒贈太子少保緯  
居官以清白稱然好用刻深吏云

武元衡字伯蒼并州文水人平一孫舉進士爲華原令鎮

太原府志

卷三十五

人物

十九

軍督將驕橫元衡移疾去德宗知其才召拜比部員外  
郎歲內三遷至右司郎中以詳整稱職擢爲御史中丞  
常對延英上目送之曰是真宰相器順宗立王叔文使  
人誘以爲黨拒不納俄爲山陵儀仗使劉禹錫求爲判  
官不與叔文滋不悅數日改太子右庶子會冊皇太子  
元衡贊相太子識之憲宗初復拜中丞進戶部侍郎元  
和二年拜門下侍郎同中書門下平章事兼判戶部事  
上素知元衡堅正有守矐禮信任異他相浙西李錡求  
入覲旣又稱疾元衡曰錡自請入朝詔旣許之而復不  
至是可否在錡陛下新卽位天下屬耳目若奸臣得遂  
其私則威令去矣上然之遂追錡而錡計窮果反卒擒  
誅之高崇文爲西川節度不知吏治時蜀新定上難其



代詔元衡檢校吏部尚書兼門下侍郎同平章事爲劔南西川節度使繇蕭縣伯封臨淮郡公上御安福門慰遣之元衡至綏靖約束儉已寬民比三年上下完實蠻夷懷歸性莊重雖淡於接物而開府極一時之選八年召還秉政李吉甫李絳數爭事上前不叶元衡獨持正無所違附上稱其長者吉甫卒淮蔡用兵上悉以機政委之王承宗請赦吳元濟使人白事中書悖慢不恭元衡叱去之承宗數上章誣詆未幾入朝出靖安里第夜漏未盡賊乘暗射元衡中肩復擊其左股徒御格鬪不勝皆駭走遂害元衡上罷朝坐延英見宰相哀慟爲再不食贈司徒諡曰忠愍

武儒衡字延石元衡從弟也姿狀秀偉不妄言與人交終

太原府志

卷三十五

人物

三

始一節宰相鄭餘慶不事華潔門下客多垢衣敗服獨儒衡上謁未嘗有所易以莊詞正色見重於餘慶元衡歿帝待之益厚累遷戶部郎中知諫議大夫事俄兼知制誥疏宰相皇甫鎛剝下狀鎛自訴上曰乃欲報怨耶鎛不敢對儒衡議論勁正有風節且將大用宰相令狐楚忌之會草狄兼謨制引武后事盛推仁傑功以沮止之儒衡泣見上曰臣祖平一當天后時避事終老不涉於累上慰勉之繇是薄楚遷中書舍人時元稹倚宦官知制誥儒衡鄙厭之會食瓜蠅集其上揮以扇曰適從何處來遽集於此一坐皆失色然以疾惡太分明終不至大任遷兵部侍郎卒年二十六贈工部尚書

劉昌裔字光後本彭城人父巨敖好讀老莊爲太原晉陽



令遂著籍陽曲昌裔幼遜重不好戲常若有所思度及壯入蜀說楊惠琳順命琳不沉浮河朔間曲環招起之爲環檄李納劉曉大誼環上其藁德宗異之從環陳許累進營田副使上官況代環知後務吳少誠兵薄城況欲遁昌裔止之賊攻堞壞不得修昌裔密造飛棚聯柵卽募突將千人鑿城以出擊賊走之比還柵已立守陴遂安兵馬使安國寧謀應賊以計斬之召其麾下千人爲饗人賞二縑乃伏兵於道令持縑者斬一不能脫賊聞解去擢況陳許節度使昌裔陳州刺史韓全義敗於澱水引軍走陳求入保昌裔登陴揖曰天子命君討蔡何爲來陳且賊不敢至我城下君其舍外無恐改陳許行軍司馬況卒軍中推昌裔有詔檢校工部尚書代節

度命境上吏不得犯蔡人有來犯者捕得縛送使自治之少誠慚亦禁境上暴掠者封彭城郡公元和八年以檢校尚書左僕射兼左龍武統軍召還卒贈潞州大都督諡曰威子光祿主簿縱嗣長子元一淮南衝將景陽景昌皆舉進士

王仲舒字宏中并州祁人曾祖元曠歷御史比部員外郎祖景肅丹陽太守父政鄂州採訪使仲舒少孤奉其母居江南與梁肅楊憑游有文稱貞元十年賢良方正高第拜左拾遺德宗欲相裴延齡與陽城交章言不可後入閣上顧宰相指曰是豈王仲舒邪俄改右補闕遷禮部考功員外郎奏議詳雅名中伏其能坐累爲連州司戶參軍再徙荆南節度參謀元和初召爲吏部員外郎



尋知制誥楊憑得罪斥無敢過其家仲舒屢存之貶陝州刺史母服除爲婺州刺史之州疫旱幾空居五年里閭增完就加金紫服徙蘇州隄松江爲路變屋瓦絕火災賦調與民期不擾自辦穆宗立每言仲舒文宜爲誥有古風召爲中書舍人旣至視同列率新進少年居不樂曰豈可復治筆硯於其間哉宰相聞之除江西觀察使罷酤錢九十萬吏坐失官息錢五十萬焚簿書脫械不問水旱民賦不入歎曰我當減宴樂他用可乎出錢二千萬代之有興浮屠祠屋者驅出境卒於官年六十二贈左散騎常侍謚曰成子初進士及第

王播字明敷太原人父恕爲揚州倉曹參軍遂僑家焉播貞元中與弟炎起皆有名並擢進士而播起舉賢良方

太原府志

卷三十五

人物

三

正異等補盩厔尉以善治獄御史中丞李汶薦爲監察御史歷侍御史李實爲京兆尹與播遇於衢故事尹當避道揖實不肯播移文詆之實怒表播爲三原令將折之播受命趨府謝如禮邑中豪彊犯法未嘗輒貸歲終課最實重其才更薦之母喪解還除駕部員外郎長安令于頔奴客與民盜馬吏繫民而縱奴播捕取均其罰遷工部郎中知御史雜事刺舉不阿有能稱關中饑言諸鎮不宜閉糴三輔獲濟歷虢州刺史李翼領鹽鐵奏爲副擢御史中丞歲終改京兆尹時禁軍屯列畿內者出入屬鞬佩劔姦人冒之以剽劫又勳戚家馳獵近郊播請一切呵止盜賊不能隱皆走出境憲宗以爲能進刑部侍郎領諸道鹽鐵轉運使置格律坐隅商處重輕



剖決如流吏不能竄其私時討淮西急饋餉引程昇自副昇尤通萬貨盈虛使馳傳江淮哀財用以給軍興兵得無乏上嘉其功超拜禮部尚書皇甫鏞忌播以昇代使播罷守本官久之爲劔南西川節度使穆宗逐鏞長慶初召爲刑部尚書復領鹽鐵進中書侍郎同中書門下平章事自是名實漸衰累進檢校司徒左僕射封太原郡公卒年七十二贈太尉諡曰敬

王起字舉之播弟也舉進士入賢良方正異等釋褐校書郎補藍田尉李吉甫辟淮南掌書記以殿中侍御史入兼集賢殿直學士元和末累遷中書舍人數諫畋游歲中考第一拜禮部侍郎河南尹進吏部侍郎播居宰相避選曹改兵部爲集賢殿學士拜陝虢觀察使入拜尚

太原府志

卷三十五

人物

三

書左丞以戶部尚書判度支奏營田靈武邠寧曠土以省餽輓歷河中節度使歲蝗旱下令家得儲粟三十斛斥其餘以市否者死神策士怙勢不從寘於法繇是唐積威出民賴以生召授兵部尚書以檢校尚書右僕射爲山南東道節度使修復濱漢塘堰與民約爲水令遂無凶年復以兵部尚書召加皇太子侍讀文宗上文好古當時鄭覃以經術進起以敦博顯上數訪逮時政因積雨願寬逐臣過惡又短鮑叔終身不忘人過以解上意俄兼太常卿禮儀使上題詩太子笏以賜詔畫象便殿號當世仲尼其寵遇如此又使廣五位圖俾太子知古今治亂開成三年入翰林爲侍講學士改太子少師武宗初爲東都留守召爲吏部尚書判太常卿上患選



士不得才特命起典貢舉進尚書左僕射封魏郡公凡四舉士皆知名者人伏其<sup>之</sup>端擢山南西道節度使同中書門下平章事以夙儒兼宰相秩前世所罕入辭上勞曰宰相無內外公國耆老朕有闕當以聞宴賜備厚宣宗初檢校司空請代不許卒年八十八贈太尉諡曰文懿命使者弔其家葬及祥如之起性友悌播喪哀戚加於人嗜學非寢食不輒廢書無不讀一經目不忘上嘗以疑事令使者口質起具榜子附使者上凡成十篇號曰寫宣他撰集亦多

王鐸字昭範播弟太常博士炎之子會昌初擢進士第累遷右補闕集賢殿直學士歷中書舍人禮部侍郎所取多才實士拜御史中丞以戶部侍郎判度支十二年絲

太原府志

卷三十五

人物

三

禮部尚書進同中書門下平章事加門下侍郎尚書左僕射超拜司徒韋保衡始由鐸得進士時竊政權鐸持其事不得肆搢紳賴焉鐸亦上疏祈解乃以檢校左僕射出爲宣武節度使僖宗初以左僕射召始鐸當國練制度智慮周密時論推允會河南盜起鄭畋數言其賢復拜門下侍郎平章事乾符六年賊破江陵議置統帥鐸因請自率諸將督羣盜卽以鐸爲侍中荆南節度使諸道行營都統封晉國公鐸舉李晟孫係爲將分精兵使守湖南俄而賊捨廣州鼓而北係坦風輒潰鐸退營襄陽於是以高駢代之貶太子賓客分司東都尋召拜太子少師從入蜀拜司徒門下侍郎平章事加侍中時誅討大計悉屬駢駢內幸多難數偃蹇坦撓鐸入對必



噫鳴流涕固請行時中和二年也乃以檢校司徒中書  
令爲義成節度使諸道行營都統判延資戶部租庸等  
使鐸表崔安潛自副鄭昌圖裴贄裴樞王搏等在幕府  
以周岌王重榮諸葛爽康實安師儒時溥六節度爲將  
佐而中尉西門思恭爲監軍率衛兵洎梁蜀師三萬壁  
蓋屋移檄天下先是諸將雖環賊莫肯先及鐸檄至號  
令殷然士氣皆起爭欲殺賊故巢戰數蹙宦人田令孜  
策賊必破欲使功出於己乃構鐸罷爲檢校司徒以義  
成節度還屯鐸功已就而讒見奪然卒因其勢困賊後  
數月復京師策勲第一四年徙義昌節度使過魏樂彥  
珍子從訓伏兵高雞泊劫之鐸及家屬吏佐三百餘人  
皆遇害弟鐸累官汝州刺史乾符中王仙芝來攻鐸自  
太原府志

卷三十五

人物

三五

督勇士與別將董漢勲守南北門城陷貶韶州司馬終  
太子賓客

王龜字大年起子性高簡博知書傳無貴胄氣所居里林  
木窮僻構半隱亭以自適侍父至河中廬中條山朔望  
一歸省州人號郎君谷未始以人事自嬰武宗雅知之  
以左拾遺召入謝自陳病詔許終喪召爲右補闕再擢  
屯田員外郎稱疾去崔嶼觀察宣歙表爲副入爲祠部  
郎中史館修撰咸通中知制誥鐸爲相改同州刺史牙  
將白約素暴橫捕殺之人皆震慄徙浙東觀察使卒贈  
工部尚書子蕘力學有文辭以鐸當國不貢進士終右  
司員外郎孫權

王式起子以蔭爲太子正字擢監良方正科累遷殿中侍



御史大中中出爲晉州刺史河曲大歉民流徙他州不納獨式勞卹之活數千人時特峨部亦飢將入寇汾澮聞式嚴備不敢道境報其種落曰當避晉州刺史以善最稱徙安南都護取一年賦市芍木豎周十二里浚壕繚柵外植刺竹寇不可冒後蠻兵入掠錦田步式使譯者開諭一夕去忠武戍卒號黃頭軍天下銳卒也交趾懼式威譁曰黃頭軍將渡海襲我矣相率夜圍城請都護北歸我當抗黃頭軍式徐被甲引家僮乘城責讓矢檜交發叛者走翌日盡捕斬之初容管災歉不歲貢至式始上輸占城真臘慕義悉入獻寧國劇賊仇甫亂明越觀察使鄭祇德不能討宰相選式往代詔益許滑淮南兵式發麾幟皆東靡獵獵有聲喜曰是謂得天時矣

太原府志

卷三十五

人物

三

聞賊用騎兵乃閩所部得吐蕃回鶻遷隸數百發龍陂監牧馬起用之集土團諸兒爲鄉導擒甫斬之加檢校右散騎常侍豪民徐澤陳斌皆專利疆縱州不能制式曰甫竊發不足畏若澤斌乃巨猾也窮治其奸皆撈死咸通三年徐州銀刀軍亂以式檢校工部尚書徙武寧節度使詔許滑兵自隨視事三日悉以計誅亂兵會詔降武寧爲團練罷歸終左金吾大將軍

王鏐字昆吾太原人爲湖南團練府裨將楊炎異其才團練使嗣曹王臯使誘降武岡叛將王國良擢邵州刺史臯節度江西禦李希烈與鏐兵三千使屯潯陽而臯軍襲蘄州遂以衆濟表鏐江州刺史兼御史中丞充都虞候鏐善刺軍中情僞臯推以腹心臯使伊慎盛兵圍安



州而遣鶚入城中約降翌日城開慎以賊降乃已功不  
下鶚鶚稱疾避之臯爲荆南節度使復檄都虞候從朝  
京師臯奏鶚文用雖不足而他可試擢鴻臚少卿先是  
天寶末西域酋長及北廷校吏集京師者數千人隴右  
陷不得歸皆仰廩鴻臚禮賓月四萬緡凡四十年至是  
鶚悉籍名王以下無慮四千人畜馬二千奏皆停給宰  
相李泌盡以隸左右神策軍以酋長署牙將歲省五十  
萬緡上嘉其功擢容管經畧使凡八年谿落安之遷嶺  
南節度使盡商舶之利召爲刑部尚書代杜佑爲淮南  
節度使入拜尚書左僕射又檢校司徒爲河中節度使  
進兼太子太傅徙河東河東自范希朝討鎮無功兵才  
三萬騎六百府庫殘耗鶚能補完嗇費未幾兵至五萬

太原府志

卷三十五

人物

三

騎五千財用豐餘會回鶻并摩尼師入朝鶚欲示威武  
傾駭之乃悉軍迎廷列五十里旗幟光鮮戈甲犀利回  
鶻恐不敢仰視鶚偃然受其禮上聞嘉之卽除檢校司  
空同中書門下平章事元和十年卒贈太尉諡曰魏鶚  
善任數持下操切性纖嗇有所程作碎瑣無所遺其家  
錢徧天下子稷歷鴻臚少卿長慶二年爲德州刺史節  
度使李全略利其貨因軍亂殺之開成中滄州節度使  
劉約奏稷子叔泰生五歲爲郡人匿養得不死送至京  
師文宗憫焉詔授九品官使奉鶚祀

也

按諡法無以國號  
爲諡者此史誤文

李光進其先河曲諸部姓阿吹氏隸朔方軍與弟光顏少  
依舍利葛旃葛旃殺僕固瑒歸河東節度辛雲京遂俱



家太原以沈果稱從馬燧救臨洛戰洹水收河中皆有功歷前後軍牙門將兼御史大夫代州刺史元和四年范希朝引師救易定表光進爲都將時光顏亦至大夫軍中呼爲小大夫六年拜振武節度使賜國姓別詔光顏拜洛州刺史弟兄寵冠當時八年徙靈武十年七月卒贈尚書左僕射光進有至性居母喪三年不歸寢光顏先娶而母委以家事及光進娶母已亾弟婦籍貲貯納管鑰於姪光進命反之曰婦逮事姑且嘗命主家事不可改因相持泣乃如初

按光進因葛旃殺僕固瑒後始歸河東則舊書所謂從子儀收兩京者誤新書刪之爲是

李光顏字光遠從河東軍爲裨將節度使馬燧謂曰若有

太原府志

卷三十五

人物

三

奇相終必光大解所佩劍贈之討李懷光楊惠琳戰有功從高崇文平劍南數搴旗陷軍出入若神益知名進兼御史大夫歷代洛二州刺史元和九年討蔡以陳州刺史充忠武軍都知兵馬使尋擢節度使詔以其軍當一面光顏乃壁澉水明年大破賊時曲始賊晨壓其營衆不得出光顏毀柵將數騎冒堅衝之出入數四賊衆盡識矢集於身如蝟其子攬光顏馬鞅止其深入光顏舉刃叱之於是人爭奮躍賊乃大敗俄又與烏重印破賊小澉河十一年敗吳元濟拔凌雲柵進檢校尚書左僕射十二年四月敗賊於鄆城死者十三數其甲凡三萬悉畫雷公符斗星署曰破城北軍鄆守將鄧懷金懼欲降且來請曰不戰而屈且赤族請公攻城我舉火求



援援至公迎破之我以城下光顏許之賊已北懷金開門待光顏入之城自壞者五十版裴度築赫連城於施口率輕騎觀之賊以奇兵自五溝至大呼薄戰亟爲震壞度危甚光顏力戰却之先是光顏策賊必至密遣田布伏精騎溝下扼其歸賊敗去死溝中者千餘由是賊悉銳士當光顏而李愬得乘虛入蔡矣董重質棄洄曲軍降愬光顏躍馬入賊營大呼衆萬餘人投甲請命賊平加檢校司空入朝召對麟德殿賜與蕃渥及討李師道徙義成節度使許以忠武兵自隨不三旬再敗賊濮陽拔斗門斬數千級上言許鄭兵合不可用遂復鎮忠武吐蕃入寇徙邠寧軍復城鹽州亦以忠武兵從党項引吐蕃圍涇州光顏料兵以赴邠人騰謀光顏爲陳說

太原府志

卷三十五 人物

三九

大義三軍感之泣下遽卽路寇遁穆宗召還賜開化里第加同中書門下平章事俄徙鳳翔將伐鎮州復還忠武又兼深冀行營節度使宰相百官班餞上御通化門臨送賜珍器良馬玉帶光顏提軍深入而餽運不至有詔以滄景德棣州益之光顏以宰相處置失宜辭兼領亦會赦王廷湊復所治詔討李齊朝受命暮卽戎翌日拔尉氏與汴人戰琵琶溝未陣薄之賊走齊卒進兼侍中敬宗初真拜司徒河東節度使寶歷二年卒年六十六諡曰忠光顏性忠義善撫士其下樂爲用許師勁悍常爲諸軍鋒故數立勲焉

王祚其先太原人魏廣陽侯曰之裔武后時諫罷萬象神宮知名開元時以大理司直馳傳決獄所至仁平子晃



歷左補闕溫州刺史孫涯

王涯字廣津晃子博學工屬文梁肅異其才薦於陸贄擢進士又舉宏辭再調藍田尉久之以左拾遺爲翰林學士進起居舍人元和初甥皇甫湜對策忤宰相涯坐不避嫌罷學士再貶虢州司馬徙袁州刺史憲宗思之以兵部員外郎召知制誥再爲翰林學士累遷工部侍郎封清源縣男涯文有雅思永貞元和間訓誥溫麗多所藁定上以其孤進自樹立數訪逮以私居遠或名不時至詔假光宅里官第諸學士莫敢望俄拜中書侍郎同中書門下平章事罷再遷吏部侍郎穆宗初出爲劍南東川節度使長慶三年入爲御史大夫遷戶部尚書鹽鐵轉運使寶歷時復出爲山南西道節度使文宗初召

太原府志

卷三十五

人物

三

拜太常卿以吏部尚書總鹽鐵歲中進尚書右僕射代郡公久之以本官同中書門下平章事合度支鹽鐵爲一使兼領之奏罷京畿榷酒錢俄檢校司空兼門下侍郎罷度支真拜司空李訓敗及禍涯質狀願省長上短下動舉詳華性嗇儉不蓄妓妾惡卜祝及他方伎嘗條上衣服室宇制使略如古貴戚皆不便議遂格年過七十不能潔去就以至覆宗子孟堅爲工部郎中集賢殿學士仲翔太常博士季琰校書郎皆遇禍昭宗天復初大赦明涯訓之寃追復爵位官其後裔

白季庚太原人北齊五兵尚書建之後也建賜田於韓城子孫家焉建生士通唐利州都督士通生志善尚衣奉御志善生溫檢校都官郎中徙下邳溫生鎰以明經歷



酸棗鞏二縣令鏗生季庚世敦儒業天寶末以明經出身授蕭山縣尉歷左武衛兵曹參軍建中初爲彭城令時李正己據河南十餘州叛正己宗人洧爲徐州刺史季庚說洧以彭城歸國遂自朝散郎超授朝散大夫檢校大理少卿擢拜本州別駕賜緋魚袋兼徐泗觀察判官終於襄州別駕子居易行簡

白居易字樂天敏悟絕人未冠謁顧況況見其文自失曰吾謂斯文遂絕今復得子矣貞元中擢進士拔萃皆中補校書郎元和元年對制策一等調整厓尉爲集賢校理二年十一月召入翰林爲學士遷左拾遺四年旱建言乞盡免江淮兩賦以救流瘠且多出宮人納之李師道上私錢六百萬爲魏徵孫贖故第居易言徵任宰相

太原府志

卷三十五

人物

三

太宗用殿材成其正寢後嗣不能守陛下猶宜以賢者子孫贖而賜之師道人臣不宜掠美從之河東王鐔將加平章事居易言鐔誅求百計不卹彫瘵今若假以名器使四方之人謂陛下得王鐔進奉而與之宰相深無益於聖朝諸鎮效尤何以給之乃止孫疇自禁衛擢鳳翔節度使張奉國定徐州平李琦遷金吾將軍居易言宜罷疇進奉國度支囚繫閩鄉獄更三赦不得原奏請一切免之凡十餘奏益知名吐突承璀率師出討王承宗居易言承璀爲制將四方闔之必輕朝廷後世且傳中人爲制自陛下始陛下忍受此名哉且劉濟等洎諸將必恥受承璀節制此乃資承宗之奸挫諸將之銳不聽旣而兵老不決又言兵宜罷後對殿中論執強鯁上



未諭輒進曰陛下誤矣上變色罷謂李絳曰是子我自  
拔擢乃敢爾必斥之絳曰陛下啓言者路故羣臣敢論  
得失若黜之是箝其口也上悟待之如初俄有言居易  
浮華無實行出爲州刺史中書舍人王涯上言不宜治  
郡追貶江州司馬久之徙忠州刺史入爲司門員外郎  
以主客郎中知制誥穆宗好畋游獻續虞人箴以諷俄  
轉中書舍人命持節宣諭田布布遺五百縑詔使受之  
固辭深州圍益急上言宜詔魏博澤潞定滄四節度令  
各守境每道各出銳兵三千使李光顏將解深州之圍  
與牛元翼合還裴度招討使使悉太原兵西壓境見利  
乘隙夾攻之不聽乃求外任除杭州刺史始築隄捍錢  
塘湖鍾洩其水溉田千頃復浚李泌六井民賴之以太

子左庶子分司東都復拜蘇州刺史病免文宗立以秘  
書監召遷刑部侍郎開成初進太子少傅封馮翊縣侯  
會昌初以刑部尚書致仕六年卒年七十五贈尚書右  
僕射宣宗以詩弔之遺命薄葬毋請諡葬於龍門香山  
居易被遇憲宗時事無不言多見聽然爲當路所忌遂  
擯斥乃放意文酒旣復用偃蹇益不合居官輒病去遂  
無立功名意與弟行簡從祖弟敏中友愛東都所居履  
道里疏沼種樹構石樓香山鑿八節灘自號醉吟先生  
爲之傳暮節經月不食葷稱香山居士嘗與胡杲吉叟  
鄭據劉真盧真張渾狄兼謨盧貞燕集皆高年人慕之  
繪爲九老圖居易於文章精切最工詩多至數千篇嘗  
時士人爭傳雞林行賈售其國相率篇易一金其僞者



相輒能辯之初與元禎酬詠號元白禎卒又與劉禹錫齊名號劉白其始生七月能展書姆指之無兩字雖試百數不差九歲暗識聲律其篤於才華蓋天稟然敏中爲相請謚曰文東都江州皆爲立祠文集七十五卷經史事類三十卷行於世

溫造字簡與信子姿表瑰傑性嗜書少所降屈隱王屋山壽州刺史張建封聞而招禮造欣然曰可人也往從之建封不敢縻以職事乃妻以兄子時密詔擇士往說劉濟建封彊署節度參謀使幽州造與濟語未訖濟俯伏流涕曰願率先諸侯效死節造還詔馳驛入奏問造家世及年對曰臣五世祖大雅外五世祖李勤臣犬馬之齒三十有二上奇之將用爲諫官以語泄乃止去隱東

太原府志

卷三十五 人物

三

都烏重印奏置幕府長慶初以京兆司錄爲太原幽鎮宣諭使賜緋衣至范陽劉總橐鞬郊迎造爲開示禍福總矍然籍所部九州入朝還遷殿中侍御史田宏正遇害以起居舍人復宣慰鎮州行營頓之坐與李景儉飲出爲朗州刺史開後鄉渠百里溉田二千頃民號右史渠名授侍御史知彈奏夏州節度使李祐拜大金吾違詔進馬造正衙抨劾祐曰吾夜入蔡州擒吳元濟未嘗心動今日膽落於溫御史遷左司郎中累遷尚書左丞封祁縣子興元軍亂殺李絳衆謂造可夷其亂文宗亦以爲能乃授檢校右散騎常侍山南西道節度使許以便宜從事上慮其勞費造曰臣計諸道戍蠻之兵方還願得密詔受約束用此足矣許之命神策將董重質河



中將溫德彝邵陽將劉士和從造而興元將衛志忠張丕李少直自蜀還造喻以意乃用八百人自從五百人為前軍既入前軍呵護諸門造欲大宴視聽事曰此隘狹不足饗士更徙牙門坐定將卒羅拜徐曰吾欲聞新軍去住意可悉前舊軍無得進勞問畢就坐酒行從兵合卒有覺者欲引去造傳言叱之乃不敢動卽問軍中殺絳狀志忠丕夾階立拔劍傳呼曰悉殺之圍兵爭奮皆斬首凡八百餘人親殺絳者醢之號令者殊死取百級祭絳三十級祭死事官王景延等餘悉投之漢江監軍楊叔元擁造靴祈哀造以兵衛出之詔流康州以功加檢校禮部尚書賜萬緡賞其兵入為兵部侍郎畱守東都俄節度河陽奏復懷州古秦渠枋口堰以溉濟源

太原府志

卷三十五

人物

三

河內溫武陟四縣田五千頃召為御史大夫方倚以相會疾不能朝改禮部尚書卒年七十贈尚書右僕射溫璋造子以蔭累官大理丞陰平吏盜官物而焚其帑璋刺得其情擢侍御史賜緋衣遷婺州刺史以政績賜金紫徙廬宋二州宣州逐其刺史討之以璋為宣州刺史事平就拜觀察使擢武寧節度使銀刀軍驕橫而璋政嚴明相率逐璋徙邠寧節度歷京兆尹璋素彊幹鉅宿弊豪右懼服加檢校吏部尚書同昌公主薨繫醫親屬三百餘人璋極諫貶振州司馬歎曰生不逢時死烏足惜仰藥死

王重榮太原祁人父縱太和末為河中騎將從石雄破回鶻終鹽州刺史重榮以父任為列校與兄重盈皆以毅



武冠軍擢河中牙將主呵察時兩軍士干夜禁捕而鞭之中尉楊元實怒執重榮讓之重榮具言其狀擢右署重榮多權詭衆所嚴憚雖主帥莫不下之稍遷行軍司馬黃巢分兵略蒲節度使李都不能支欲降然內憚重榮表以自副重榮脇說都曰我所詭謀舒難以外援未至今賊哀責日急又收吾兵以困我則亡無日矣請絕橋嬰城自守不然變生何以制之都曰願以節假公都遂奔行在重榮乃悉驅出賊使斬之上使前京兆尹竇溥聞遣慰其軍因詔代都重榮遂主留後賊使朱溫以舟師下馮翊黃鄴自華陰合攻重榮重榮感勵士衆大戰敗之賊棄糧仗四十餘艘卽拜檢校工部尚書爲節度使會忠武監軍楊復光率陳蔡兵萬人屯武功重榮

與連和擊賊將李詳於華州執以徇賊使尚讓來攻而朱溫將勁兵居前敗重榮兵於西關門遂出兵夏陽掠河中漕米數十艘重榮選兵三萬攻溫溫懼悉鑿舟沈於河遂舉同州降表爲同華節度使巢喪二州怒甚自將精兵數萬壁梁田重榮軍華陰復光軍渭北犄角攻之賊大敗執其將趙璋巢中流矢走重榮兵亦死耗相當懼巢復振憂之與復光計乃乞師於克用克用使陳景斯總兵自嵐石赴河中親率師從之遂平巢復長安以功檢校太尉同中書門下平章事封瑯琊郡王累加檢校太傅中人田令孜建請二池領屬鹽鐵重榮不聽令孜徙重榮充海節度使以王處存代之詔克用將兵援河中重榮上書劾令孜離間方鎮令孜遣邠寧朱玫



進討壁沙苑重榮遣克用書且言奉密詔須公到使我  
圖公此令致朱全忠朱玫之謀也因示偽詔克用遂合  
河中兵戰沙苑玫大敗神策軍潰還京師大掠克用乘  
勝西天子走鳳翔俄嗣襄王熈僭位重榮不受命與克  
用謀定王室楊復恭代令玫領神策故與克用善遣諫  
議大夫劉崇望齎詔諭意克用重榮聽命獻縑十萬願  
討玫自贖重榮遂斬熈長安復平重榮嘗辱部將常行  
儒行儒怨之光啓三年引兵夜攻府重榮亡出外詰旦  
殺之推立重盈重盈已爲陝虢節度使同中書門下平  
章事及代重榮畱長子琪領節度事入殺行儒軍復安  
乾寧二年卒軍中以其兄重簡子珂出繼重榮故推爲  
畱後琪爭之珂援於李克用昭宗許嗣鎮王行瑜李茂

太原府志

卷三十五

人物

三

貞韓建連兵犯京師固請授琪河中克用怒以師討三  
鎮帝出幸定州克用進營渭橋請天子還宮遂以珂爲  
節度使克用以女妻之劉季述廢帝珂憤見顏色屢陳  
討賊謀旣反正首獻方物上甚倚之及克用兵折朱全  
忠遣張存敬襲克絳晉以何緡戍之進攻珂全忠率師  
繼進卽劾珂交構克用爲方鎮生事不可赦珂乞師太  
原爲緡所進不能進珂急使妻遺克用書曰賊攻我朝  
夕見俘乞食大梁矣克用答曰道且斷往救必俱亡不  
如歸朝廷珂窮又求救於李茂貞茂貞不答珂益賊會  
橋毀潛具舟將遁夜諭守兵無肯爲用者牙將劉訓請  
行成以緩敵珂然之明日登城語存敬存敬解圍而戍  
以兵全忠自洛至全忠王出也始背賊事重榮約爲甥



舅德其全已指日月曰我得志凡王氏者皆事之至是過重榮墓偽哭而祭次虞鄉珂出迎握手泣下駢轡以入居旬日舉珂室徙於汴後令人覲遣人賊之於華州自重榮傳珂凡二十年

郝忠榆次人官昭武校尉上柱國通志稱其文可經國武可濟時珪璋之器無玷無瑕敵愾之心有謀有勇

索自通清源人字德之為方鎮有戰功

後唐

張丕陽曲人尚氣節李克用鎮太原多選富家子主帑庫或調度不給卽坐誅沒入貲產丕為之滿歲府財有餘宗人政當次補其任率族屬泣拜請丕濟其急丕又為代掌一年鄉里服其義孫頴晉安州防禦使曾孫承德

太原府志

卷三十五

人物

三

李嗣昭本姓韓氏汾州太谷縣民家子太祖出獵至其家見林中鬱鬱有氣召其父問焉父言家適生兒太祖因遺以金帛而命弟克柔養為子初名進通後更名嗣昭為人短小而膽勇過人初嗜酒太祖嘗微戒之遂終身不飲太祖愛其謹厚常從用兵為內衙指揮使王琪與兄珂爭立遣嗣昭助珂敗琪於猗氏梁軍救琪又敗之於虎壁堡光化元年取澤州二年取潞州三年取洛州天復元年梁圍太原嗣昭日以精騎出擊梁兵會大雨梁軍解去復取汾州斬叛將李瑋遂出陰地取慈州降其刺史唐禮又取隰州降其刺史張瓌是歲梁軍圍鳳翔嗣昭乘間攻梁晉絳戰平陽執梁將一人進攻蒲縣梁朱友寧氏叔琮以兵十萬迎擊之嗣昭走梁軍圍太



原太祖謀走雲州李存信等勸奔契丹嗣昭力爭以爲不可乃止嗣昭晝夜出奇兵擊梁軍梁軍解去嗣昭復取汾慈隰是時鎮定皆絕晉而附梁晉外失大國之援內亡諸州浹歲間孤城被圍者再於此時嗣昭力戰之功爲多天祐三年與周德威攻梁潞州降丁會以嗣昭爲昭義軍節度使梁遣李思安將兵十萬攻潞築夾城以圍之嘗遣人招降嗣昭斬其使閉城拒守踰年莊宗始攻破夾城嗣昭完輯兵民撫養甚有恩意梁晉戰胡柳周德威戰死莊宗欲還臨濮嗣昭曰梁軍已勝旦暮思歸吾若收軍使彼休息整而復出何以當之宜以精騎撓之因其勞乏可以勝也莊宗然之是時梁軍已登無石山嗣昭轉擊山北而莊宗以銀槍軍趨而呼曰今

日之戰得山者勝晉軍爭登山梁軍遽下陣於山西晉軍從上急擊大敗之權知幽州居數月代去幽州人皆號哭閉關遮留之夜遁乃得去十九年從莊宗擊契丹於望都契丹圍數十重嗣昭以三百騎決圍取莊宗以出是時閻寶攻鎮州敗嗣昭代之鎮兵出掠九門嗣昭以奇兵擊之鎮軍且盡餘三人匿破垣中嗣昭馳馬射之反爲賊射中腦顧箠中矢盡拔矢於腦射殺一人還營而卒嗣昭諸子繼儔長而懦弟繼韜自立爲昭義軍畱後懼誅降於梁數月梁滅會赦至隨其母楊氏朝於京師以賂免陰令弟繼遠起變於軍中以求歸鎮事泄誅以繼儔知潞州事其弟繼達殺繼儔節度副使李繼珂攻之繼達自剄死繼能繼襲皆見殺惟繼忠僅免家



於晉陽晉高祖用爲忻隸單三州刺史關運中卒

張憲字允中晉陽人沉靜寡慾少好學能鼓琴飲酒莊宗素知其文辭以爲天雄軍節度使掌書記及卽位拜工部侍郎租庸使遷刑部侍郎判吏部銓東都副畱守憲精於吏事甚有能政莊宗幸東都命治卽位壇爲鞠場憲言卽位壇王者所以興也漢鄱南魏繁陽壇至今皆在不可毀莊宗卒毀之又問憲庫錢幾何憲上庫簿有錢三萬緡莊宗謂以故紙給我益怒之郭崇韜伐蜀薦憲可任爲相而宦官伶人不欲憲在朝廷樞密承旨段徊曰憲材誠可用不如任以一方乃以爲太原尹北京畱守趙在禮作亂憲家在魏州在禮善待其家遣人以書招憲憲斬使不發書而上之明宗入京師永王存霸奔太原左右請拘之憲曰吾本書生無尺寸之功而人主遇我甚厚豈宜懷二心以幸變第可與之俱死爾從事張昭遠教憲奉表勸進憲涕泣拒之已而北京巡檢符彥超麾下兵大譟殺存霸憲出奔忻州亦見殺

安永信交城人爲唐節度使諡忠簡贈太師見舊志

後晉

王權字秀山太原人唐左僕射起之曾孫右司郎中堯之子權舉進士爲右補闕唐亡事梁爲職方員外郎知制誥翰林學士累遷御史中丞唐莊宗滅梁貶隨州司馬起爲右庶子累遷戶部尚書晉高祖時爲兵部尚書是時高祖以父事契丹權當奉使辭不行坐是停任踰年以太子少傅致仕卒年七十八贈左僕射

太原府志

卷三十五

人物

三



相里金字奉金并州人爲人勇悍而折節下士爲五院軍  
隊長與梁戰柏鄉胡柳皆有功遷黃甲指揮使同光中  
拜忻州刺史時諸州皆以部曲主場務漁蠹公私金獨  
禁部曲不與事遷隴州防禦使廢帝起兵鳳翔首遣判  
官薛文遇往來計事廢帝初拜保義軍節度使晉高祖  
起太原廢帝以金爲太原四面步軍都指揮使晉初徙  
鎮建雄罷爲上將軍天福五年卒贈太師

後周

鄭仁誨字日新太原晉陽人初事唐將陳紹光紹光嘗因  
醉怒仁誨拔劍欲殺之左右皆奔走仁誨植立不動無  
懼色紹光擲劍於地曰汝有器量必富貴非吾所及也  
仁誨後還鄉里事母以孝聞周太祖居河東帳下時時

太原府志

卷三十五

人物

罕

往過仁誨與語甚懽每事有疑卽從質問仁誨所對不  
阿周太祖益奇之漢興薦爲內客省使周祖攻李守貞  
於河中軍中機書仁誨多所參決太祖入立以爲大內  
都點檢恩州團練使樞密副使累遷宣徽北院使出爲  
鎮寧軍節度使顯德元年拜樞密使世宗攻河東仁誨  
畱守東都明年冬疾卒仁誨自其微時嘗爲太祖謀畫  
及居大位太祖世宗皆親重之性謙謹好禮不自矜伐  
爲士大夫所稱贈中書令追封韓國公諡忠正

韓通并州太原人弱冠應募以勇力聞補騎軍隊長累加  
檢校左僕射隱帝卽位遷奉國指揮使乾佑初周祖伐  
河中知通謹厚命之自隨先登身被六創以功遷都虞  
候爲天雄軍馬步軍都校周祖委以心腹及入汴甚有



力焉授奉國左第六軍都校歷階防禦使河溢灌河陰城命率廣銳卒千二百浚汴口又部築河陰城朔營壁拜保義軍節度劉崇南侵命副河中王彥超出晉州道擊之高平之役進圍太原以通爲北面行營部署穴地道攻其城已而班師世宗以深冀間有胡蘆河東西橫亘數百里堤塌非峻不足以扼奔突顯德二年命浚治之功未就遼師至通迎擊退之遂城李晏口爲靜安軍四旬而訖又城東鹿鼓城并葺祁州收瘞遺骸爲萬人冢又城博野安平領百餘騎督役夜宿古寺晝披荆棘會遼騎數百奄至通率麾下與戰日暮大風雨遼人解去又城百八橋鎮武強縣胥旬日而畢攻秦鳳爲西面行營馬步軍都虞候入大散關圍鳳州分兵城固鎮以

斷蜀餉道遂拔鳳州爲京城都巡檢時築新城又廣舊城街道通領其役會幸淮上畱爲在京內外都巡檢權點檢侍衛司是役也期以三年才半歲而工就三年改忠武歸德節度六年春詔按行河堤因發徐宿宋單等州民浚汴渠數百里世宗將北征命通先赴滄州卽領兵入遼乾寧軍之南俄巡北邊自浮陽至淤口浦壞坊三十六遂通瀛莫初克益津關以爲霸州役濱棣民數千城之師還以檢校太尉同平章事充侍衛親軍馬步軍副都指揮使恭帝卽位移領鄆州陳橋之役通在殿閣聞有變惶遽而歸軍校王彥昇遇於路策馬逐之通馳入其第未及闔門爲彥昇所害妻子皆死宋太祖詔贈中書令以禮收葬遣高品梁令珍護喪事通性剛而寡



謀號韓瞪眼其子頗有智略病偃號橐駝兒常勸通早為之所通不聽後太祖見通及其子畫像於開寶寺壁遽命去之

李筠太原人善騎射初隸後唐秦王從榮麾下從榮難作筠騎從至天津橋射殺十數人已而遁去清泰初應募為內殿直遷控鶴指揮使晉開運末遼將趙延壽召寘帳下及延壽被繫耶律解里統二千騎畱鎮州筠與諸將謀伺間擊之控鶴左廂都校白再榮持兩端匿室中筠拔佩刀破幕引臂逼再榮行殺傷相當解里棄城去送款於漢授筠博州刺史周太祖鎮大名表為先鋒指揮使從起兵入汴敗慕容彥超於畱子陂遷昭義軍節度檢校太傅同平章事累以奇兵擊敗遼援北漢兵加

太原府志

卷三十五

人物

三

兼侍中恭帝立進太尉宋太祖立遣使加兼中書令諭以入朝筠即欲拒命左右為陳歷數黽俛下拜及延使者升階置酒張樂遽索周太祖畫像懸壁涕泣不已賓佐惶駭告宋使曰令公被酒失其常性幸勿為訝太祖遣其子皇城使守節諭旨筠謀益急遂起兵從事閭邱仲卿曰大梁兵甲精銳難與爭鋒我孤軍舉事其勢甚危倚援河東終未得力不如西下太行直抵懷孟塞虎牢據洛邑東向爭天下計之上也筠曰吾周朝宿將禁衛皆舊人必倒戈歸我況有儋珪槍儋珪筠愛將善用槍撥汗馬何憂天下哉遂執監軍周光邈送於承鈞求濟師使人殺澤州刺史張福據其城承鈞率兵來援筠謁於太平驛見兵衛寡弱內甚悔承鈞封筠西平王筠自陳受周



祖大恩不敢愛死而周漢爲世讐承鈞心疑之命宣徽使盧贊監其軍筠益怏怏畱子守節守上黨自引衆南向宋遣石守信高懷德討之敕曰勿縱筠下太行急進師扼其隘破之必矣太祖遂親征與守信會破筠衆於澤州南殺盧贊筠走還保澤州太祖親督戰拔其城筠赴火死隨進兵攻潞州守節降

趙廷隱并州太原人隨孟知祥入蜀拳勇有智略知祥麾下無及者東川董璋襲成都廷隱大破之璋奔歸爲部下所殺知祥遂有其地及僭號令總親軍爲衛聖諸軍馬步軍指揮使累遷至太師中書令封宋王卒諡忠武

以下孟蜀

趙崇韜廷隱子驍果有父風爲都知領殿直四番累遷至

太原府志

卷三十五

人物

聖

客省使周世宗克秦鳳將入蜀境爲崇韜拒退歷左右衛聖步軍都指揮使選其子文亮尚主加領洋州武定軍節度山南武定緣邊諸砦都指揮副使漢源之戰獨策馬先登及軍敗猶手擊殺十數人爲宋師所擒

高彥儔并州太原人父暉宣威軍使彥儔從知祥入蜀累歷軍校爲昭武軍監押景嗣位遷邛州刺史改馬步軍使漢兵入大散關克安都砦彥儔以所部先進漢人燒砦毀閣遁彥儔盡銳追之復其砦而還尋領趙州刺史拜源州武定軍節度周顯德初向訓攻鳳州彥儔出兵未至聞軍敗於唐滄遁歸成都景不之罪廣政二十二年授夔州寧江軍都巡檢制置招討使利州昭武軍節度宋師至謂副使趙崇濟監軍武守謙曰北軍涉遠而



來利在速戰不如堅壁以待之守謙不從獨領麾下出戰敗走彥儔以所部將出拒戰宋師已乘城而入判官羅濟勸歸成都不從又勸之降曰今日止有死耳卽解符印投濟具衣冠望西北再拜登樓縱火自焚後數日劉廷讓得其骨煨燼中以禮收葬初景母語景惟彥儔可任及是果能死難

宋

邊光範字子儀并州陽曲人性謙退和易雅有吏才父仁嗣忠武軍節度副使光範後唐天成二年起家榆次令名爲殿中丞賜緋長興四年改太常丞晉天福初授檢校戶部員外郎北京畱守判官兼侍御史二年拜太府少卿上書請遷刺史以蘇民瘼不報出帝時累遷給事

太原府志

卷三十五

人物

醫

中使亳州括借軍糧稱爲平允漢初檢校刑部尚書衛尉卿上言伏見朝廷除刺史不限年月或未及期年又聞除代往來跋涉豈暇撫懷望慎選良牧立定年限以責輯綏之效又不報周廣順中爲禮部侍郎將及秋試言於執政曰他曹公事光範不敢辭若處文衡校閱名賢品藻優劣非下走所能及期辭疾不出時論多其自知世宗初改刑部侍郎權知開封府俄遷戶部顯德三年檢大名民田五年普均租稅光範詣宋州韓通言其均平世宗嘉之宋初征澤潞命爲前軍轉運計度鄭洛汝孟懷芻糧拜太常卿簽判吏部選事建隆四年權知襄州路當衝會餉饋無缺人不知勞五年兼橋道使以州卒代民官給器用役不淹久人以無擾詔書褒美開



寶四年復判吏部銓曹尋判御史臺事數月真拜中丞  
六年以疾辭銓任卒年七十三光範性至孝嘗吮母疽  
景德中錄其孫易從同學究出身

王祚并州祁人初為吏有心計晉時掌鹽鐵案漢祖鎮并  
州委祚經度芻粟卽位擢三司副使周為隨州刺史法  
禁牛革輦送京師者遇暑雨輒腐壞祚請班甲式於諸  
州令裁之以輸民甚便之移刺商州以俸錢募人開大  
秦山岩梯路行旅頌德改鎮潁州均租稅實流徙出舊  
籍疏通商渠入淮郡以無水患宋初領宿州防禦使課  
民鑿井修火備築城北隄以禦水災拜左領軍衛上將  
軍致仕子溥

王溥字齊物漢乾佑中舉進士甲科為秘書郎周祖討三

太原府志

卷三十五

人物

五

叛辟為從事河中平得朝貴及藩鎮交結書將按之溥  
諫曰魑魅之形伺夜而出日月既照氛沴自消願一切  
焚之以安反側周祖從之師還遷太常丞從鎮鄴廣順  
初授左諫議大夫累遷戶部侍郎端明殿學士周祖疾  
革召學士草制以溥為中書侍郎平章事宣制畢周祖  
曰吾無憂矣世宗將親征澤潞獨溥贊成之世宗嘗從  
容問曰漢相李崧以蠟書與遼信有之耶溥曰崧為大  
臣設有此謀肯輕示外人蓋蘇逢吉誣之耳世宗悟詔  
贈崧官將討秦鳳溥薦向拱為帥事平世宗因宴酌酒  
賜溥曰為吾擇帥成邊功者卿也顯德四年丁艱起復  
表四上乞終喪六月夏命參知樞密院事恭帝立加右  
僕射宋初進位司空罷參知樞密院乾德二年罷為太



子太保五年加太子太傅開寶二年遷太子太師中謝  
太祖曰溥十年作相三遷一品福履之盛近世未見其  
比太平興國初封祁國公七年八月卒年六十一輟朝  
二日贈侍中謚文獻溥性寬厚美風度好汲引後進其  
所薦至顯位者甚衆好學手不釋卷嘗集唐會要百卷  
五代會要三十卷有集二十卷子貽孫貽正貽慶貽序  
貽孫見文苑傳貽正國子博士貽慶比部郎中貽序景  
德二年進士後改名貽矩至司封員外郎貽正子克明  
以尚主改名貽永

王貽永字季長溥孫性清慎寡言頗通書不好聲伎生十  
餘歲時舅魏咸信見而奇之曰後當類我咸平中尚鄭  
國公主再遷右監門衛大將軍求外補知單州真宗戒

太原府志

卷三十五

人物

異

之曰和衆靜泊所當先也為徐州團練使河決滑州徐  
大水作隄城南以禦之為保寧軍節度使知鄆州州之  
通衢介梁山春夏多水患貽永相度地勢為築東西道  
三十餘里民便之徙成德軍累擢樞密院使拜同中書  
門下平章事兼侍中徙節鎮海以疾求罷徙節彰德至  
和初復以疾辭拜尚書右僕射檢校太師兼侍中景靈  
宮使卒贈太師中書令謚康靖貽永能遠權勢在樞密  
十五年迄無過失人稱其謙靜子道卿西上閣門使  
藥元福并州晉陽人幼有膽氣善騎射後唐為天平軍內  
外馬軍都指揮使晉天福中為深州刺史開運初契丹  
師次於河少帝駕駐澶淵元福以左千牛衛將軍領兵  
居陣東偏或告契丹曰先攻其東即浮梁可奪也契丹



盡銳來戰元福領二百騎躍出而鬪奮鐵搥擊契丹斃者數人左右馳突無不披靡契丹兵潰遂投秦州刺史明年與李守貞等禦契丹於陽城爲右廂副排陣使糧道斷絕士馬饑渴契丹順風揚塵諸將欲俟風反與戰元福曰軍中饑渴已甚若俟風反出戰吾屬爲虜矣乃率麾下騎開拒馬出戰諸將繼至契丹大敗追北二十餘里殺獲甚衆改威州刺史會三族酋長拓跋彥超石存也廝褒攻靈州節度王令溫詔馮暉鎮朔方率關右兵進討以元福將行營騎兵元福與暉出威州土橋西遇彥超兵七千餘邀暉行李元福轉戰五十里殺千級擒三十餘人又遣部校援出令溫朔方距威州七百里無水草號旱海師須齋糧以行至耀德食盡比明行四

太原府志

卷三十五

人物

四

十里彥超等衆數萬布爲三陣扼要路據水泉以待暉遣人賂之求和解往復數四至日中不決元福率麾下騎先擊西山兵敵潰舉旗招暉暉軍繼進彥超大敗橫尸蔽野是夕入清邊軍明日至靈州元福還郡詔賜衣帶繒帛銀器漢乾祐中從趙暉討王景崇於鳳翔蜀兵數萬來援都監李彥從擊之軍却元福領數百騎自後驅之下令還顧者斬衆皆殊死戰大敗蜀兵追至大散關殺二千餘人餘皆棄甲遁去鳳翔平以功遷淄州刺史周廣順初爲徐州行營兵馬都監平叛將楊溫改陳州防禦使劉崇擾晉州以元福爲西北面都排陣使軍過蒙坑與仇超陳思讓追至霍邑元福欲追奔深入諸將畏懦遂止周祖後調兵戍晉州曰去年若從藥元福



言則無邊患矣俄爲兗州行營馬步軍都虞候討慕容  
彥超築連城以圍兗彥超晝夜出兵屢擊敗之遂閉壁  
不敢出十餘日元福營柵皆就又穴地及築土山百道  
攻其城會周祖親征元福以所部先入羊馬城諸軍鼓  
譟角進拔之以功授建雄軍節度世宗圍太原以元福  
爲同州節度充太原四面濠砦都部署時攻具悉備以  
糧運不繼班師元福曰進軍甚易退軍甚難世宗曰一  
以委卿遂部分卒伍爲方陣而南元福以麾下爲後殿  
崇果出兵來追擊走之師還加檢校太尉移鎮陝州又  
歷定廬曹三鎮宋初加檢校太師九月卒年七十七贈  
侍中元福雖老筋骨不衰人或言其氣貌益壯當復領  
兵必大喜時稱驍將

太原府志

卷三十五

人物

吳

侯章榆次人事後唐莊宗爲隊長晉開運末爲忠衛指揮  
使屯兵陝州爲內外馬步軍都指揮使兼三城巡檢使  
與趙暉王晏謀斬遼將劉愿送欵於漢祖擢鎮國軍節  
度乾佑初加同平章事周世宗時爲武勝軍節度宋建  
隆元年八月授太子太師封楚國公旣罷節鎮時有輕  
章者章厲聲曰當遼主疾作謀歸有上書請避暑嵩山  
者我虜人以戰鬪取富貴若此諛佞未嘗爲之坐中有  
慚者乾德五年卒

郭從義其先沙陀部人父紹古事後唐武皇賜姓李氏紹  
古卒從義纔卅角莊宗畜於宮中與諸子齒明宗卽位  
累遷內園使晉天福初復姓郭氏遂家太原漢祖鎮河  
東表爲馬步軍都虞候屢破契丹於代北及建大號從



義首贊其謀漢祖入汴以爲河北都巡檢使累遷永興軍節度圍趙思綰於永興城中食盡以計誘降之并其黨三百餘人悉斬於市以功加同平章事周廣順初加兼侍中移鎮許州世宗將征劉崇從義來朝因請扈從世宗甚悅改天平軍節度卽令從符彥卿破遼師於忻口師還加兼中書令移鎮徐州宋初加守中書令護國軍節度改左金吾衛上將軍上章請老拜太子太師致仕開寶四年卒贈中書令從義性重厚有謀略多技藝尤善飛白書子守忠閑廐副使守信字寶臣知書與士大夫游至東上閣門使知邢州卒子世隆比部員外郎世隆子昭祐承祐昭祐閣門祗候承祐官至建武軍節度

太原府志

卷三十五

人物

兪

武行德榆次人身長九尺餘材貌奇偉家貧負薪自給遇晉祖獵郊外見其魁岸又所負倍常令力士更舉之皆不勝頗奇之因畱帳下天福中爲寧國軍都虞候契丹擾汴行德被獲僞請自效契丹信之令率軍校載什物鎧甲送歸其國方舟數十泝汴至河陰行德謂諸將曰我曹皆受國厚恩與其離鄉井投邊塞曷若共守河陽以圖富貴衆皆曰諾卽共殺契丹監使分授器甲由汜水倍道抵河陽契丹節度崔廷勳出兵來拒行德麾衆逆擊自旦及午殊死戰廷勳大敗棄城走遂據河陽盡以府庫分給將士因推行德知州事厲士卒繕甲兵據上游士氣益奮人望歸之聞漢祖起太原自稱河陽都部署遣弟行友由間道奉表勸進授河陽三城節度使



漢祖至洛行德以所部兵翼至京師還河陽加同平章事周廣順初加兼侍中遷河南尹西京畱守時鹽禁甚嚴有關吏希賞令僧從民媼鬻蔬密寘鹽管中媼持入城吏擒以送府行德覺其誣釋媼斬僧及關吏人畏之若神明顯德初封譙國公世宗卽位兼中書令爲武寧節度方議南征疏古汴隄東達於泗上尋爲濠州行營都部署破淮軍於境俄爲吳人所敗左官復授保大軍節度宋初加中書令封魏國公開封儀同三司入爲太子太傅太平興國三年致仕卒贈太師

李萬超并州太原人幼孤貧負販以養母爲晉祖軍校從討楊光遠奮勇先登飛石中其腦氣不屬者久之開運中從拒遼師於陽城流矢貫手拔矢復戰神色自若以

太原府志

卷三十五

人物

李

功遷肅銳指揮使開運末以本部屯潞州主帥張從恩將棄城歸遼會前驍衛將軍王守恩服喪私第從恩委以後事及遼使至專領郡務守恩一無所預萬超乃率所部大譟入府署殺其使推守恩爲帥列狀以聞漢祖從其請仍命史宏肇統兵先渡河至潞見萬超曰得復此州公之力也吾欲殺守恩以公爲帥可乎萬超對曰殺使以推守恩蓋爲社稷計耳今若賊害於人自取其利非宿心也宏肇大奇之表爲先鋒馬步軍都指揮使路經澤州刺史翟令奇堅壁拒命萬超馳至城下諭降宏肇卽畱萬超權州事遂爲刺史及征李守貞爲行營壕砦使河中平拜懷州刺史周初從征慕容彥超又爲都壕砦使以功授洺州團練使預收秦鳳改萊州從平



淮南連移斡登二州所至有善政屬有詔重均田租前  
宰平令馬陶隱苗不通命繫之將斬而後聞陶懼遁去  
由是境內肅然宋初入爲右武衛大將軍遷左驍衛開  
寶八年卒

石曦并州太原人晉祖弟韓王暉之子天福中爲右神武  
將軍周恭帝初爲左衛將軍充使高麗宋建隆三年再  
使高麗遷左驍衛大將軍護秦州屯兵西人犯邊擊破  
之斬渠帥十三人太祖征晉領兵二千人自澤潞除道  
至太原壅汾水灌其城又益兵千人部攻遼州俄知雄  
州又爲潭州鈐轄開寶八年敗南唐軍於袁州平梅山  
板倉渚洞蠻寇俘馘數千人雍熙四年知霸州兼部署  
陳廷山謀以平戍軍叛入北邊曦察知定計擒之以功

太原府志

卷三十五

人物

至

加領本州團練使同知鎮州遷右龍武軍大將軍卒

張承德字抱一并州陽曲人不曾孫承德生四歲母馬氏  
被出育於祖母事繼母劉以孝聞周祖初爲侍衛吏與  
其父頴善乃以女妻承德表授供奉官押班累遷殿前  
都指揮使顯德元年世宗戰高平大將樊愛能何徽退  
衄時宋太祖與承德各領牙兵二千承德部下善左射  
厲兵分進大捷降劉崇軍七千餘及駐上黨世宗晝臥  
帳中召承德曰前日之戰主將殊不用命吾將案之以  
法承德曰陛下欲固守分疆則已必欲開拓疆宇威加  
四海宜痛懲其失世宗擲枕於地大呼稱善翌日誅二  
將以徇軍威大振進攻太原承德與符彥卿史彥超北  
控忻口斷契丹援路契丹援兵至彥超戰沒繼敗其衆



二千餘衆遁去師還領義成軍節度時承德父頴爲隸人曹澂所害因奔南唐會議南征承德請自効至壽春劉仁贍堅壁不下承德出疲兵誘之傍伏精騎大敗之仁贍僅以身免三年世宗親征至壽州仁贍檻送澂等三人詔賜承德俾其甘心宋太祖與承德領前軍至紫金山吳人列十八砦壘西有高隴下瞰其營承德選勁弓強弩伏隴旁太祖麾兵直攻第一砦戰佯不勝淮人果空砦出鬪承德亟登隴發伏馳入據之敵衆散走翌日攻第二砦鼓譟而進始攻北門淮人開南門遁時韓令坤在揚州遣承德率師援之又敗泗州軍於曲溪堰吳將林仁肇帥衆千餘水陸齊進以船載薪乘風縱火將焚周浮梁俄而風反承德進兵敗之又夜使習水者

太原府志

卷三十五

人物

五

沒其船下縻以鐵鎖引輕舸急擊之溺者甚衆承德解金帶賞習水者乃距浮梁十餘步以鐵索千餘尺橫截長淮又維以巨木自是備禦益堅詔褒美之冬擢爲殿前都點檢四年從克壽州還授檢校太尉領鎮寧軍節度五年夏命率步騎二萬拒契丹還加檢校太尉同中書門下平章事恭帝時移鎮忠武宋初加兼侍中承德入朝授武勝軍節度召對後苑道故舊每呼駙馬不名太平興國二年復來朝拜左衛上將軍六年封鄧國公雍熙中連知滄雄定三州端拱元年爲河北兩路排陣使屯定州嘗與遼戰斬獲甚衆真宗卽位進封衛國公判左金吾街仗事咸平初屢表請老授太子太師分司西京仍以其孫大理寺丞文蔚釐務洛下以便就養二



年冬將北巡以承德宿將召入對賜坐訪以邊要畱爲  
東京內外都巡檢使三年授檢校太師彰德軍節度知  
天雄軍以衰老還鎮是秋卒年七十三贈中書令承德  
出母後適安邑劉祚及承德鎮南陽祚已卒迎母歸解  
起二堂與繼母劉並居劉卒馬預中參時年八十一太  
宗勞之賜冠帔封莒國太夫人同母弟劉再思署子城  
使諸孫文蔚至虞部員外郎文炳殿中丞

白重贊憲州樓煩人

宋時樓煩縣屬嵐州今嵐縣也憲州今靜樂縣也

其先沙陀

部族重贊少從軍有武勇漢初白散員都虞候三遷護  
聖都指揮使乾祐中李守貞據河中叛隱帝以重贊爲  
行營先鋒都指揮使河中平以功領端州刺史周初轉  
護聖左廂都指揮使未幾出爲鄭州防禦使改相州畱

太原府志

卷三十五

人物

垂

後廣順中授義成軍節度在鎮日河屢決重贊親部下  
壯塞大程六合二堤詔書褒美世宗征劉崇以重贊爲  
河東道行營馬軍都指揮使重贊與李重進居陣西偏  
樊愛能何徽居陣東偏旣合戰愛能與徽皆遁走惟重  
贊與重進率所部力戰世宗自督親軍合勢薄之并人  
大敗旣誅愛能等重贊以功授保大軍節度使及世宗  
征太原以河陽劉訶爲隨駕都部署命重贊副之其忻  
州監軍殺刺史趙臯及契丹大將楊耨姑以城降而契  
丹兵猶盛命重贊及符彥卿擊走之世宗還京改河陽  
三城節度檢校太尉及征淮南命重贊率親兵三千軍  
于潁上未幾改淮南道行營馬步軍都虞候俄遷彰義  
軍節度宋初加檢校太師改鎮涇州歷泰寧定國節度



改左千牛衛上將軍開寶三年卒

慕容延釗太原人父章襄州馬步軍都校領開州刺史延釗少以勇幹聞事周世宗爲殿前散指揮使高平之戰督左先鋒以功授虎捷左廂都指揮領本州團練使遷殿前都虞候出爲鎮淮軍都部署顯德五年與宋延偓大破南唐兵淮南平遷殿前副都指揮使領淮南節度恭帝卽位改鎮寧軍充殿前副都點檢延釗與太祖友善太祖卽位延釗方握重兵屯真定遣使諭旨許以便宜從事治邊以靜鎮聞加殿前都檢點同中書門下三品李筠叛以延釗爲行營都部署知潞州行府事及平加兼侍中還澶州建隆二年來朝賜宅一區徙山南東道節度四年春命師南征爲湖南道行營前軍都部署

太原府志

卷三十五

人物

五

時延釗被病令肩輿卽戎賊將汪端擾朗州誅之荆湘旣平加檢校太尉是冬卒年五十一贈中書令追封河南郡王子德業衛州刺史德鈞尚食副使弟延忠磁州刺史延卿虎捷都指揮使延卿子德琛

慕容德豐字日新延釗次子幼聰悟八歲父鎮山南東道補衙內指揮使父卒授如京使江南平爲昇州都監以廉潔聞太平興國二年知愛州兼邠寧都巡檢使嘗破小遇族奪名馬數十匹詔書褒諭居任九年以簡靜爲治邊鎮安之爲定遠軍鈐轄別將萬騎以禦邊知靈州兼部署穀價貴出私廩賑饑全活者衆賊入境擊走之咸平二年知鎮州遼人南侵德豐繕兵固守餉饋不絕下詔獎之德豐輕財好施厚享將士歷潁貝瀛三州團



練使家無餘財論者善之子維素殿內承制

慕容德琛延釗從子蔭補供奉官累遷內殿崇班知夔州李順黨張餘領衆十萬舟千艘來寇與戰龍山斬首千餘級又與白繼贊擊斬二萬餘悉焚其舟賊剽開州圍雲安德琛往援斬百餘級累詔褒諭咸平二年轉荆湖北路鈐轄蠻擾澧鼎境與戰於北漢奪耕牛鎧甲斬馘以歸天禧初改右監門衛大將軍

李進卿并州晉陽人以驍勇隸護聖軍晉天福中隨杜重威敗安重榮於宗城力戰有功擢興順軍校周祖命戍靈壽久之遷龍捷指揮使顯德初從戰高平歷內殿直都虞候宋初遷鐵騎左廂都指揮使伐蜀爲歸州路行營步軍都指揮使拔巫山砦下夔萬二州拜侍衛親軍

太原府志

卷三十五 人物

五

步軍都虞候領保順軍節度使上征河東畱爲在京都巡檢遷步軍都指揮使改節靜江卒贈侍中子延渥

李延渥進卿子以蔭補供奉官歷知瀛州景德元年十月遼師抵城下四面夾攻旬日勢益張延渥率州兵強壯又集巡檢史普所部乘城發礮石巨木擊之攻者皆纍纍而墜殺傷甚衆翼日遼主與其母親鼓衆急擊延渥分兵拒守益堅遼人遁去死者三萬餘傷倍之獲鎧甲兵矢竿牌數百萬賜錦袍金帶將士緡錢遷本州團練使初戍棚垂板護城纜數寸許遼師射之矢集其上凡二百餘及請葺城詔取板視之上亟稱其勞二年徙知邢州歷天雄軍貝州副都部署知冀貝博三州大中祥符八年以疾換右領軍衛大將軍領濱州團練使明年



以左武衛大將軍致仕天禧初卒子宗禹內殿崇班  
羅彥瓌太原人父全德晉沁州刺史彥瓌蔭補內殿直授  
興順指揮使爲契丹送廐馬千匹赴幽薊至元氏聞漢  
祖建號太原以馬歸漢漢祖嘉之擢護聖指揮使周世  
宗時從向訓收秦鳳有功爲散指揮都虞候恭帝元年  
宋太祖自陳橋入歸公署見宰相范質等未及言彥瓌  
挺劍厲聲曰我輩無主今日必得天子質等由是降階  
聽命擢爲控鶴左廂都指揮使改內外馬軍都軍頭領  
眉州防禦使從平澤潞破李筠衆於碾子谷乾德二年  
爲安國軍節度與李繼勳大破契丹兵四年春又與田  
欽祚破北漢軍於靜陽擒其將鹿英明年移鎮華州開  
寶三年卒

王全斌并州太原人幼穎敏其父事唐莊宗爲岢嵐軍使  
私畜勇士百餘人莊宗召之懼不敢行全斌時年十二  
謂其父曰此蓋疑大人有他圖請以全斌爲質父從其  
計果獲全因隸帳下莊宗入洛累遷內職同光之難近  
臣宿將皆遁全斌獨與符彥卿等十數人居中拒戰莊  
宗中流矢扶掖至絳霄殿慟哭而去晉初遷護聖指揮  
使周廣順初爲相州畱後宋初與慕容延釗討李筠以  
功拜安國軍節度使詔完葺西山堡砦不踰時而就建  
隆四年與郭進等克樂平乾德二年伐蜀拜忠武軍節  
度西川行營前軍都部署率禁軍步騎二萬諸州兵萬  
人由鳳州路進討召示川陝地圖授以方畧十二月率  
兵拔乾渠渡萬仞燕子二砦遂下興州蜀刺史藍思綰



退保西縣敗蜀軍七千人獲糧四十餘萬斛進拔石圍魚關白水二十餘砦先鋒史延德進軍三泉敗蜀軍數萬擒招討韓保正副使李進獲糧三十餘萬斛旣而崔彥進康延澤等逐蜀軍過三泉遂至嘉陵俘獲甚衆蜀人斷閣道軍不能前延澤彥進督治閣道數日而成全斌繇羅川路趣深渡與彥進會分三道進擊蜀人悉其精銳逆戰大破之三戰三敗追至利州北蜀樞密王昭遠遁退守劍門遂克利州趨劍門次益光全斌會諸將議進取之策有言益光江東越大山數重有狹徑名來蘇自此出劍關南二十里至清強店與大路合於此進兵卽劍門不足恃也乃命史延德分兵趨來蘇昭遠聞之引兵退陣於漢源坡獨畱偏將使守劍門全斌等擊

太原府志

卷三十五 人物

五

破之遂克劍州四年正月師次魏城孟昶遣使奉表降全斌等入成都旬餘劉延讓等始自峽路至昶餽遺及犒師並同全斌詔書頒賞諸軍亦無差降由是兩軍相嫉帥亦不協會詔發蜀兵赴闕遂有全師雄之擾分兵招輯賊衆始息召還令中書問狀責授崇義軍觀察畱後開寶末車駕幸洛陽郊祀召全斌侍祠諭之曰朕以江左未平慮征南諸將不遵紀律故抑卿數年爲朕立法今已克金陵還卿節鉞授武寧軍節度使仍以銀器一萬兩帛萬匹錢千萬賜之至鎮數月卒年六十九贈中書令天禧二年錄其孫永昌爲三班奉職全斌輕財重士不求聲譽寬厚容衆軍旅樂爲用黜居山郡十餘年怡然自得識者稱之



王審鈞全斌子由崇儀使領富州刺史爲廣州兵馬鈐轄  
後爲永興軍駐泊都監以擊賊死弟審銳供奉官閣門  
祇候

王凱字勝之審鈞孫僑京兆饒於財散施結客口馳獵南  
山下尹寇準見而奇之爲言全斌取蜀有勞審鈞又死  
忠義當錄其孤遂爲三班奉職歷閣門祇候定邢趙都  
巡檢使元昊反徙麟州都監嘗出雙烽橋染枝谷遇夏  
人破之又破龐青黃羅部再戰於伺候烽前後斬三百  
餘級獲馬牛橐駝器械以數千計夏人圍麟州乘城拒  
鬪晝夜三十一日始解去遷麟州路緣邊都巡檢使護  
糧道於青眉浪寇猝失至與同巡檢使張崑相失乃分  
兵出其後來擊之復與崑合斬首百餘級又入兔毛川

太原府志

卷三十五

人物

王

遇賊三萬凱以兵六千陷圍流矢中面鬪不解斬首百  
餘級賊自蹂踐死者以千數內侍宋永誠哭於軍劾罷  
之遷并代州鈐轄管勾麟府軍馬事夏人二萬寇青塞  
堡凱出鞋邪谷轉戰四十里至杜肱川大敗之得所掠  
馬牛以還遷資州刺史會平甘陵盜拜澤州刺史知邠  
州澤州團練使歷環慶并代定州路副都總管涇州觀  
察使徙秦鳳路入辭帝諭以唃氏木征交易阻絕頗有  
入寇之萌宜安靜以處之至則撫以恩信遂復常貢拜  
武勝軍節度觀察畱後卒年六十六贈彰武軍節度使  
謚莊恪孫誅見文苑傳

劉通并州太原人父延慶晉漢間爲右驍衛大將軍通在  
宋初掌禁旅從潘美征廣南積功至虎捷都指揮使領



嘉州刺史太平興國中從征太原道卒贈潁州防禦使  
其女卽章獻明肅皇后累贈通太師尚書令開府儀同  
三司魏王諡武懿

馬峰并州太原人仕劉繼元至樞密使左僕射太平興國  
四年太宗征太原繼元窮窘而并人猶欲堅守峰時已  
老疾致仕居於家昇入見繼元流涕以興亡喻之繼元  
乃降太宗以峰爲將作監遷太府卿分司西京雍熙元  
年卒

楊業并州太原人父信漢麟州刺史業幼倜儻任俠善騎  
射畋獵恒倍獲嘗曰我他日用兵亦猶用鷹犬逐雉兔  
爾弱冠事劉崇爲保衛指揮使累遷建雄軍節度使屢  
立戰功所向克捷國人號爲無敵太宗征太原素聞其

太原府志

卷三十五 人物

五十九

名嘗購求之旣而業勸其主繼元降上遣中使召見業  
大喜以爲右領軍衛大將軍授鄭州刺史上以業老於  
邊事遷代州兼三交駐泊兵馬都部署密封橐裝賜予  
甚厚會遼師入鴈門業領數千騎出小徑至鴈門北口  
南嚮背擊之遼師大敗以功遷雲州觀察使仍判鄭州  
代州自是遼人望見業旌旗卽引去主將戍邊者多忌  
之或潛上謗書上皆不問封其奏以付業雍熙三年北  
征命業副潘美爲雲應路行營都部署以西上閣門使  
王侁軍器庫使劉文裕護其軍諸軍連拔雲應寰朔四  
州師次桑乾河會班師美等歸代州未幾詔遷四州民  
於內地令美等以所部兵護之時遼人復陷寰州業謂  
美等曰今遼兵益盛不可與戰宜領兵出大石路先遣



人告雲朔守將俟大軍離代州日合雲州之衆先出我師次應州卽令朔州民出城直入石碣谷遣彊弩千人列谷口以騎士援於中路則三州之衆保萬全矣旆曰但趨鴈門北川中鼓行而往文裕亦贊成之業曰不可此必敗之勢也旆語侵之業不得已而行泣謂美曰此行必不利業太原降將分當死上不殺寵以連帥授之兵柄非縱敵不擊蓋伺其便將立尺寸功以報國恩今諸君責業以避敵業當先死於敵因指陳家谷口曰諸君於此張步兵彊弩爲左右翼以授俟業轉戰至此卽以步兵夾擊救之不然無遺類矣美旆陣谷口自寅至巳旆使人登臺望之以爲遼師敗走欲爭其功卽領兵離谷口美不能制業力戰至暮果至谷口望見無人拊

太原府志

卷三十五

人物

李

膺大慟再率帳下士力戰身被數十創士卒殆盡業猶手刃數十百人馬重傷遂爲遼人所擒不食而死其子延玉亦歿焉上聞之痛惜甚下詔贈太尉大同軍節度賜其家布帛千匹粟千石大將軍潘美降三官監軍王旆劉文裕皆除名業不知書忠烈武勇有智謀練習攻戰與士卒同甘苦代北苦寒但挾纊露坐理軍事傍不設火侍者殆僵仆而業怡然無寒色爲政簡易御下有恩故士卒樂爲之用朔州之敗麾下尚百餘人業謂曰汝等各有父母妻子與我俱死無益也可走還報衆皆感泣不肯去朝廷錄其子供奉官延朗崇儀副使次子殿直延浦延訓供奉官延環延貴延彬殿直

楊延昭本名延朗後改焉業之子幼沉默寡言多戲爲軍



陲業曰此兒類我征行必從太平興國中補供奉官業  
攻應朔延昭爲先鋒戰朔州城下流矢貫臂鬪益急以  
崇儀副使知景州爲江淮南都巡檢使改崇儀使知定  
遠軍徙保州緣邊都巡檢使就加如京使咸平二年冬  
遼攻遂城城小無備長圍數日遼蕭后督戰衆心危懼  
延昭悉集城中丁壯登陴賦器甲護守會大寒汲水灌  
城上旦悉爲冰堅滑不可上遼人潰去獲鎧仗甚衆以  
功拜莫州刺史屢請益兵於傳潛潛不許及潛抵罪名  
赴行在訪以邊要上甚悅指示諸王曰延昭父業爲前  
朝名將延昭治兵護塞有父風深可嘉也厚賜遣還是  
冬遼人南侵延昭伏銳兵於羊山西自北掩擊且戰且  
退及西山伏發遼衆大敗獲其將函首以獻進團練使

太原府志

卷三十五

人物

空

五年遼侵保州延昭未成列爲遼所襲上曰延昭素以  
勇聞當觀其後效宥之六年夏遼侵望都復命延昭爲  
都巡檢使條上防秋利害徙寧邊軍部署景德元年詔  
益延昭兵滿萬人如遼騎入寇則屯靜安軍之東令莫  
州部署石普屯馬村西以護屯田斷黑盧口萬年橋敵  
騎奔衝之路仍會諸路兵犄角追襲令魏能張凝田敏  
奇兵牽制之時王超爲都部署不聽隸屬延昭上言遼  
師頓澶淵去北境千里人馬俱乏雖衆易敗凡有剽掠  
率在馬上願飭諸軍扼其要路衆可殲焉卽幽易數州  
可襲而取不報乃率兵抵遼境破古城俘馘甚衆及遼  
請和遷邊州守臣命知保州兼緣邊都巡檢使二年進  
防禦使俄徙高陽關副都部署在屯九年大中祥符七



年卒年五十七延昭智勇善戰所得俸賜悉犒軍未嘗問家事出入騎從如小校號令嚴明與士卒同甘苦遇敵必身先行陣克捷推功於下故人樂爲用在邊防二十餘年遼人憚之目爲楊六郎及卒上嗟悼之遣中使護櫬歸河朔人多望柩而泣錄其三子官其常從門客亦試藝致之

楊文廣字仲容延昭子以班行討賊張海有功授殿直范仲淹宣撫陝西與語奇之置麾下從狄青南征知德順軍爲廣西鈐轄知宜邕二州累遷左藏庫使帶御器械治平中上以文廣名將後且有功擢成州團練使龍神衛四廂都指揮使遷興州防禦使秦鳳副都總管韓琦使築算策城文廣聲言城噴珠率衆急趨算策比暮至

太原府志

卷三十五

人物

空

其所部分已定遲明敵騎大至知不可犯而去遺書曰當白國主以數萬精騎逐汝文廣襲之斬獲甚衆或問其故答曰此必爭之地彼若知而據之則未可圖也詔褒諭賜襲衣帶馬知涇州鎮戎軍爲定州路副都總管遷步軍都虞候遼爭代州地界文廣獻陣圖并取幽燕策未報而卒贈同州觀察使

王貴并州太原人廣順初補衛士宋初累遷散員都指揮使馬步軍都軍頭領勝州刺史太平興國二年爲淄州刺史從潘美北征攻沁州立戰功及從楊業爲遼兵所圍貴射殺數十人矢盡張空眷又擊殺數人遂遇害年七十三擢其子文晟供奉官文昱殿直

李廷珪并州太原人七歲隸孟知祥帳下後從入蜀知祥



僭號補軍職累遷奉鑿肅衛都虞候拔階州以功領着州刺史遷閬州保寧節度周師攻秦州以廷珪爲北路行營都統失秦成階三州復爲遂州武信軍節度領本鎮及保寧軍都巡檢使王全斌下劍關景遣廷珪與其子元喆將兵來拒至綿漢狼狽而還廷珪素儉約歸朝爲右千牛衛上將軍卒

伊審徵字申圖并州人父延瓌隨孟知祥入蜀知祥以女妻之歷陵嘉肴三州刺史審徵幼以孝聞母病割股肉啖之以父在歷蜀州刺史廣政十四年召爲通奏使知樞密院事領武泰軍節度選其子崇度尚公主改寧江軍節度同平章事與王昭遠並掌機務宋初入審徵奉表歸朝授靜難軍節度

太原府志

卷三十五

人物

三

李守節字得臣周昭義節度筠子宋受周禪筠畜異謀時守節爲皇城使嘗泣諫不聽太祖遣守節諭旨曰吾聞汝諫父不聽吾今殺汝何如汝歸語汝父我未爲天子時任自爲之旣爲天子獨不能臣我耶守節以白而筠謀愈甚遂起兵畱守節守上黨自引衆南向澤州破筠赴火死太祖進伐上黨守節以城降以爲單州團練使筠妾劉氏欲與筠俱死筠以其有姪麾令去守節購得之果生子焉守節年三十三卒無後以劉氏所生之弟爲嗣

侯贊并州太原人父義漢遼州刺史贊以蔭補殿前承旨周顯德中再遷至供奉官領三門集津發運使先是朝廷歲仰關中穀麥以給用贊掌其事歷三十年國用無



闕累遷至右武衛將軍開寶中歷知建安軍揚徐二州皆有善政太宗卽位移知福州錢俶納土詔贊馳往兩浙諸路閱視軍儲以右衛大將軍知靈州按視蕃落宴搞以時得邊士心部內大治遷左衛在朔方凡十餘年上念久次求可代者而難其人淳化二年卒於官贈本衛上將軍

吳延祚字慶之并州太原人少頗讀書事周祖爲親校世宗初累遷宣徽南院使判河南府知西京畱守事汴河決督丁壯數萬塞之增築堤防自汴城至臨淮數旬訖工世宗北征權東京畱守師還進檢校太傅充樞密使恭帝時加檢校太尉宋初加同中書門下三品李筠叛延祚謂太祖曰潞城崑險且阻太行賊據之未易破也

太原府志

卷三十五

人物

畝

筠素勇而輕若速擊之必離上黨來邀我戰猶獸亡其藪魚脫於淵因可擒矣太祖遂行以延祚畱守東京兼判開封府討李重進再爲畱守建隆二年夏授雄武軍節度秦州夕陽鎮西北多材植高防知州日議就置采造務西夏酋尚波于率衆爭奪防捕繫其黨上令延祚代防賚詔赦尚波于等夏人感悅是年秋以伏羗地來獻乾德二年改鎮京兆開寶四年來朝遇疾車駕臨問尋卒年五十四贈侍中官給葬事延祚謹厚寡言性至孝母喪絕水漿累日好學聚書萬餘卷治家嚴肅子元輔元載元範元晟元吉元慶元範元慶皆禮賓副使元吉閣門祗候元吉子昭允太子中舍元慶子守仁內殿

崇班



吳元輔字正臣好學善筆札周廣順中補供奉官遷洛苑使宋初授左驍衛將軍澶州巡檢累官定州鈐轄卒子昭德昭遜昭普並閭門祇候

吳元載建隆初授通事舍人賜緋魚袋太平興國三年加閭門祇候使遼九年出知陝州雍熙三年徙秦州州民李益爲長道縣酒務官家饒財僮僕數千指恣橫持郡長短長吏皆畏之民負息錢郡爲督理推官馮伉不從益遣奴伺伉按市拽之下馬毀辱之伉屢表其事爲邸吏所匿不得達後因市馬譯者附表以聞上大怒詔元載逮捕詔書未至權貴已報益益亡命元載以聞上愈怒詔州郡物色急捕之獲於河中府民郝氏家鞠于御史府具得其狀斬之益子光祿寺丞仕衡除籍民皆飯太原府志

卷三十五 人物

奎

僧相慶淳化中知成都府受代歸時李仕衡通判華州遣人闕行裝元載拒之仕衡抗章疏其罪坐責郢州團練副使移單州授左衛將軍致政卒子昭明內殿崇班昭矩太子中舍

吳元辰字君華太平興國八年尚太宗女蔡國公主授左衛將軍駙馬都尉雍熙三年元辰表求試劇郡命知鄆州尋知河陽淳化五年秋霖河溢城將壞元辰躬涉泥滓督工補塞民多構木樹杪以避水元辰濟以舟楫設餅餌以食時澶陝悉罹水災河陽賴以獲安真宗初知澶州轉運使劉錫上其治狀遷知定州時王超王繼忠領兵踰唐河與遼人戰元辰度其必敗急發州兵護河橋超等果敗遼人乘之至橋見陣兵甚盛遂引去考滿



吏民詣闕貢馬疏其善政十事願借畱樹碑表德屬歲旱吏白召巫以土龍請雨元辰曰巫本妖民龍止獸也安用之惟精誠可以動天乃設壇潔齋三日百拜祈禱澍雨沾洽景德二年拜武勝軍節度三年爲修諸陵都部署出知潞州領澤潞晉絳慈隰威勝七州軍戎事加檢校太傅知徐州大中祥符四年改領山南東道卒年五十贈中書令諡忠惠元辰性謹讓待賓佐以禮喜讀春秋左氏聲色狗馬一不介意所得祿賜卽給親族孤貧者公主有乳媪得入參宮禁元辰慮其妄有請託白上拒之真宗深所嘉嘆獨稱其賢及歿甚悼惜之子守禮至六宅使澄州刺史以國甥特贈和州防禦使守嚴內殿崇班天禧中錄守嚴子承嗣承緒爲殿直守良內

太原府志

卷三十五

人物

五

殿崇班守讓閣門祗候

郭守文并州太原人父暉仕漢爲護聖軍使從周祖征河中戰死守文年十四居喪哀毀周祖召隸帳下廣順初補左班殿直再遷東第二班副都知宋初遷西頭供奉官蜀平遷知簡州時劍外多寇守文悉招徠之從征嶺南會擒劉鋹遷翰林副使從平金陵護送李煜歸闕好語慰之煜心始安改西京作坊使俄從党進破并寇於團柏谷太平興國初乘傳撫諭蕃部西夏悅伏三年遷西上閣門使夏汴水決寧陵董宋毫丁壯四千五百塞之冬又塞靈河縣決河及征太原分護行營馬步軍會劉繼文據代州討平之俄受詔護定州屯兵大破遼人於蒲城以功遷東上閣門使雍熙二年領武州團練使



屯兵三交屬夏人擾攘命守文帥師討之破夏州鹽城  
鎮岌羅臆等十四族斬首數千級俘獲生畜萬計又破  
咩鬼族殲而諸部長懼相率來降凡銀麟夏三州歸附  
者百二十五族萬六千餘戶西鄙遂寧五年春大舉北  
伐爲幽州道行營前軍步軍水陸都監卒與遼人遇爲  
流矢所中氣色不撓督戰益急軍中服其量會大軍不  
利坐退軍左官明年復職爲北面排陣使屯鎮州端拱  
初爲北面行營都部署兼鎮定高陽關兩路排陣使冬  
遼騎南侵大破之唐河三年十月卒贈侍中諡忠武追  
封譙王守文沈厚有謀畧頗知書每朝退習書百行出  
一言溫雅未嘗忤人意先是將臣戍邊者多致寇以邀戰  
功河朔諸州殆無寧歲旣敗岐溝關乃命守文以內職  
太原府志

卷三十五

人物

七

總兵鎮常山以經畧之守文旣喪月餘中使自北邊來  
言守文死軍士皆流涕帝問何以得此對曰守文得俸  
祿賜資悉犒勞士卒死之日家無餘財帝嗟嘆久之賜  
其家錢五百萬爲真宗納其女爲夫人卽章穆皇后也  
子崇德太子中舍崇信皇城司使崇儼崇儀使崇德子  
承壽虞部員外郎

郭崇仁字永年守文子章穆皇后弟也歷閣門祇候契丹  
入寇齎密詔諭河北諸將還奏稱旨累遷崇儀副使章  
穆崩除莊宅使拜解州團練使歷賀磁二州防禦使卒  
崇仁雖外戚朝廷未嘗過推恩澤其爲解州十年不遷  
嘗除知相衛二州皆辭不行蓋其性愼靜不樂外官也  
楊美并州文水人狀貌雄偉武力絕人以豪俠自任周祖



征三叛杖策詣軍門與語壯之畱帳下廣順初累遷禁  
軍大校世宗征淮南以功擢鐵騎都指揮使領白州刺  
史與宋祖故舊卽位授內殿直都知建隆三年爲北海  
軍使政尚簡易民咸德之乾德二年召還北海民詣闕  
乞畱詔諭之不去答之始罷會討蜀爲歸州路戰擢左  
右廂都指揮使累遷虎捷左右廂都指揮使領河西軍  
節度使征太原爲行營馬軍都虞候太平興國二年出  
爲保靜軍節度使三年以疾卒年四十八贈侍中美任  
氣好施凡得賜予及俸祿盡賙親故死之日家無餘財  
人多嘆息之

常延信并州平晉人祖思與周祖有舊歷昭義歸德平盧  
三鎮節度延信隨補牙職領和州刺史思卒入爲六宅

太原府志

卷三十五

人物

突

使建隆初改領平州坐事貶右監門衛副率領護滑州  
黃河隄開寶中爲潼關監軍關路巖險奏易道路及填  
禁院役工四十餘萬改梓遂十二州都巡檢使賜袍帶  
錢百萬太平興國初秩滿再任賜錢四十萬捕誅山寇  
三百餘人雍熙三年爲全部六州都巡檢使就充羊狀  
六砦都鈐轄會誠州蠻歸款命延信馳入溪洞索其要  
領逐蠻直趨古鎮過西延大木諸洞蠻人懼伏淳化中  
屢部徒修護河防歷左屯衛將軍充西京水南都巡檢  
使盜掠彭婆鎮及甲馬營延信馳往悉擒之景德三年  
卒

楊重進太原人少隸周祖帳下補衛士宋初累遷至內殿  
直都虞候太平興國中從征太原出爲萊州刺史隨曹



彬北征爲右廂排陣使改武州防禦使高陽關都部署  
雍熙三年冬遼將于越入寇誘殺瀛州將賀令圖重進  
力戰沒於陣

安守忠字信臣并州晉陽人父審琦周平盧節度使封陳  
王晉天福中審琦領山南東道守忠署牙內指揮使領  
繡州刺史顯德中初下淮南命守忠馳往宣諭抗以正  
禮無所辱命改衛州刺史宋祖居潛雅相厚善及卽位  
守忠入爲左衛將軍自處益謙及從征太原多與謀略  
人罕知之建隆四年湖南平命爲永州刺史蜀平特命  
知興元府時朝使旁午公帑不足守忠出私錢以給用  
太祖每戒使者言守忠在蜀能律已以正汝行見之當  
效其爲人開寶初改濮州刺史副曹翰塞澶州決河五

太原府志

卷三十五

人物

堯

年知遼州部民陰召并人爲亂斬以徇九年入其境燔  
砦四十餘太平興國初移知靈州雍熙二年改易州徙  
夏州每西戎犯邊戰輒捷錄功就拜濮州團練使端拱  
中知瀛州兼高陽關駐泊部署遷防禦使淳化二年徙  
知雄州方宴有軍校謀變擐甲及閤守忠言笑自若徐  
顧坐客曰此輩酒狂爾擒之可也人服其量至道三年  
拜威德軍節度觀察畱後知宋州兼制置營田使吏民  
不忍其去咸平三年卒贈太尉錄其子繼昌爲供備庫  
副使

呼延贊并州太原人父琮周淄州馬步都指揮使贊少爲  
驍騎卒以材勇遷驍雄軍使從王全斌討蜀當前鋒身  
中數創以功補副指揮使太平興國初爲鐵騎軍指揮



使從征太原先登乘城及堞而墜者數四太宗面賜金帛獎之俄從崔翰戍定州擢馬步軍副都軍頭獻陣圖兵要及樹營砦之策求領邊任召見令作武藝具裝執鞭馳騎揮鐵鞭棗槊旋繞廷中數四又引其四子必興必改必求必顯以入更迭舞劍槃槊賜白金衣帶端拱中出爲保州刺史冀州副都部署改遼州刺史復爲都軍頭領扶州刺史加康州團練使咸平二年從幸大名爲行宮內外都巡檢上嘗補軍校皆敘已功贊獨進曰臣月俸百千所用不及半忝幸多矣不敢更求遷擢再拜而退衆嘉其知分三年卒贊有膽勇鷙悍輕率常言願死於敵徧文其體爲赤心殺賊字至妻孥僕使皆然諸子耳後別刺字曰出門忘家爲國臨陣忘生爲主所

作破陣刀降魔杵鐵折上巾兩旁有刃皆重十數斤絳帕首乘騅馬服飾詭異贊卒後擢必顯爲副都軍頭

武英字漢傑太原人父密爲鎮定同巡檢與契丹戰歿於望都贈西京左坊使錄英爲三班借職以右班殿直爲忻代州巡檢州將出獵敵乘間引百餘騎來寇英領衆左右馳射悉擒獲之以功轉左班殿直改閣門祇候爲環州都巡檢使徙洪德砦主又徙慶州柔遠砦元昊寇延州英主兵攻後橋以分敵勢擢內殿承制環慶路駐泊都監破党平族又從任福破白豹城遷禮賓副使尋兼涇原行營都監與福合戰張家堡敵棄羊馬僞遁諸將皆趨利英度前必有伏衆不聽伏發福敗英猶力戰自辰至申矢盡遇害贈邢州觀察使錄子永符爲東頭



供奉官承孚西頭供奉官承昌左侍禁姪永保左班殿  
直永錫三班奉職

袁繼忠振武人徙并州父進周階州防禦使繼忠蔭補右  
班殿直宋平澤潞討并汾悉預攻戰從劉廷讓征蜀蜀  
旣克知雲安軍歷嘉蜀二州監軍伐廣南爲先鋒有功  
遷供奉官護隰州白壁關屯兵數入河東境破三砦擒  
將校二人得生口馬牛羊鎧仗萬計近戍主將懼無功  
受譴以誠告繼忠卽以所獲分與之太宗初爲閭門祇  
候擊破梅山洞賊從征太原預破鷹揚軍先登陷陣遼  
師至代擊走之護高陽關屯兵破遼師長城口殺獲數  
萬璽書褒美有勸繼忠自論其功者繼忠不答趙保忠  
獻綏州地刺史李克憲偃蹇不奉詔遣繼忠諭旨竟率

太原府志

卷三十五

人物

七

克憲入朝與田仁朗率兵定河西諸州大破西人於葭  
蘆雍熙三年大將田重進伐遼繼忠爲定州路行營馬  
步軍都監取飛狐下靈邱平蔚州擒其帥大鵬翼以獻  
師還繼忠爲殿行列甚整至定州重進欲殺降卒後期  
至者繼忠救免之李繼隆以易州靜塞騎兵尤驍果取  
隸麾下繼忠以爲不可旣而契丹陷靜塞城盡俘騎兵  
妻子繼隆疑軍怨已欲分隸諸將繼忠勸使奏升其軍  
額優以廩給厲其盡節衆遂感悅會遼師大至駐唐河  
北諸將欲堅壁待之繼忠曰今疆敵在近城中屯重兵  
不能剪滅顧令長驅深入乎我知先士卒死於寇耳辭  
氣慷慨衆壯之靜塞軍陷鋒先入遼師大潰太宗聞之  
降璽書獎諭遷引進使護鎮定高陽關兩路屯兵病卒



繼忠長厚忠謹士大夫多與遊前後賜賚鉅萬悉以犒士既死家無餘財人以此稱之子用成雍熙初登進士第至太常博士

尹憲并州晉陽人事太宗於藩邸擢爲殿直充延州保安軍使太平興國四年護府州屯兵與鄜州三族會攻嵐州擒知州馬延忠拔緣河諸砦以功轉西京作坊副使入朔州界破寧武軍殺其軍使獲人馬器甲甚衆轉供備庫使改護夏州誅三汭醜奴莊岌伽羅臧葉十四族誘其渠帥降詔褒美雍熙初就知夏州攻破李繼遷於地斤澤繼遷遁走俘獲四百餘帳憲奏請抽移諸帳於所部別置騎兵號曰平砦詔從之三年知瀛州淳化五年知定州卒

太原府志

卷三十五 人物

三

石普幽州人徙居太原祖全周鐵騎軍使父通事太宗於晉邸普十歲給事邸中以謹信見親補寄班祇候遷東頭供奉官捕獲永興賊邢橐駝賈禿指等數百人遷內殿崇班帶御器械爲西川行營先鋒討平李順遷西京作坊使領欽州刺史順餘黨復寇邛蜀稱邛南王又爲西川都提舉捉賊使入陳致亂之由宜蠲賦斂使自爲生上許之普卽日還蜀揭榜諭上意蜀人悅服賊平遷洛苑使領富州團練使延州緣邊都巡檢使羗七羽內寇普追殺之王均叛爲川峽路招安巡檢使擊破賊於天回鎮攻益州城破之均自殺餘黨悉平遼人犯邊爲保州兵馬鈐轄北面行營押策先鋒戰廉良城長城口獲俘馘器甲甚衆徙定州路副都總管靈州失守徙永



典軍之言臣嘗將兵輒破一錢與別將各持其半用相合爲信上乃置傳信牌又獻禦戎圖請設塹以陷敵馬并上所置戰械甚衆徙莫州總管聞遼人將南侵令統軍一萬屯莫州浚靜戎順安軍營田河道徙屯順安之西遷冀州總管澶淵之役王繼忠遣人持信箭遺普且通密表和議成遷容州觀察使鄜延路副總管趙德明納款普言不宜授以押蕃落使名目恐總制屬羌強橫將不可制乃止徙并代路總管改桂州觀察使鎮州路總管遷保平軍節度觀察畱後上祀汾陰還至陝駐驛城中賜詩令扈從至西京拜河西軍節度使知河陽徙許州築大流堰引河通漕京師上軍機條目二卷用將機宜要訣二圖時方崇尚符瑞而普請罷天下醮設歲

可省緡錢七十餘萬以贍國用由是忤帝意王欽若構之坐私藏天文除名貶賀州稍復至左衛大將軍給官第居蔡州卒普侗儻有膽略凡預計伐聞敵卽馳赴兩平蜀盜大小數十戰衆推其勇通兵書陰陽六甲星歷推步之術太宗嘗謂普剛鷲少合然藉其善戰每厚遇之後以罪廢每太宗忌日必盡室詣佛寺齋薦以爲常夏守恩字君殊并州榆次人父遇武騎軍校與契丹戰歿補守恩下班殿侍給事襄王宮遷西頭供奉官眞宗初四遷至北作坊使普州刺史從幸澶淵數見任使遷博州刺史歷龍神衛捧日天武四廂都指揮使秦州防禦使章獻預政以守恩領親兵倚用之擢殿前都虞候天聖初以安遠軍畱後管勾殿前馬步軍都指揮使加步



軍副都指揮使威塞軍節度使爲永定陵總管雷允恭  
徙皇堂穿地得水守恩以聞允恭等伏誅徙節河陽三  
城歷知澶相漕三州并代路馬步軍都總管歷天雄泰  
寧武寧三節度使爲真定府定州路都總管坐法除名  
編管連州卒

夏守贇字子美守恩弟幼召入襄王宮稍長習通文字真  
宗初授右侍禁帝幸大名爲駕前走馬承受時康保裔  
戰歿部曲畏誅言保裔降賊守贇受密詔變服入營中  
廉得其情還奏稱旨詔恤保裔家幸澶淵汾陰皆爲駕  
前巡檢轉崇儀使甚見親信尋遷西上閤門使提舉諸  
司庫務爲樞密都承旨兼領三班院每遼使至與楊崇  
勳迭爲館伴凡十餘年擢并代州都總管徙定州路都

太原府志

卷三十五

人物

七

總管寶元二年召知樞密院事問以西事守贇言平時  
小障屯兵不及千餘賊兵盛至固守不暇安能出鬪耶  
宜併其兵以據衝要伺便邀擊功或可成上然之自請  
將兵擊賊換宣徽南院使陝西馬步軍都總管兼經略  
安撫緣邊招討使守贇素無方略不爲士卒所服未幾  
召爲同知樞密院事復爲真定府定州等路都總管徙  
高陽關判瀛州卒贈太尉諡忠僖子隨

夏隨字君正好儒術多從士大夫游仁宗在東宮爲率府  
副率及卽位除內殿承制歷閤門使出爲天雄軍兵馬  
鈐轄知衛州遷泰州防禦使元昊反爲鄜延路副都總  
管徙環慶路復還鄜延元昊爲僞書錦袍銀帶以遺金  
明李士彬約與同叛候人得之諸將皆疑士彬隨曰此



行間耳士彬與羌世仇若其私約豈使衆知耶乃召士彬與飲厚撫之士彬感泣後數日果斬賊首自效爲陝西副都總管兼緣邊招討副使次陝州病卒贈昭信軍節度使諡莊恪

閻守恭并州榆次人父榮倜儻有志畧守恭體貌奇偉僑寓大名初應募隸拱聖軍擢殿前押班咸平中從幸河北以功爲捧日副指揮使累遷左第二軍指揮使乾州刺史明道中以德州刺史爲永興軍兵馬鈐轄徙并代路守恭性沉勇御軍嚴雖家居如對賓客常訪求士大夫取郭進事而師法之所得俸祿悉散予人在并州因春社會賓客曰守恭太原一貧民爾徒步位刺史老復官鄉里踰分多矣今日與卿輩訣後十日卒

太原府志

卷三十五

人物

七

高若訥字敏之并州榆次人徙衛州進士及第除秘書省著作佐郎遷太常博士知商河縣縣有職分田牛種皆假於民若訥獨廢不耕楊偕薦爲監察御史裏行改左司諫遷起居舍人知諫院范仲淹奪職歐陽修移書責之王蒙正知蔡州若訥言蒙正起裨販因緣戚里得官向徙彬州物論猶不平今予之大州可乎詔寢其命大慶殿設祈福道場若訥奏曰大慶殿非禮不御非法服不坐國之路寢也豈可聚老釋爲瀆慢閭文應爲入內都知若訥言其肆橫不法請出之遂出文應又奏三公坐而論道今二府對數刻何以盡萬幾宜賜坐從容如唐延英故事擢天章閣待制知永興軍雷判吏部流內銓出爲河東路都轉運使召還權判尚書刑部丁母



憂始許行服服除以右諫議大夫權御史中丞時宰相  
賈昌朝與叅知政事吳育數爭事上前明年春旱若訥  
言陰陽不和責在宰相洪範大臣不肅則雨不時若干  
是昌朝及育皆罷爲樞密副使王則反據貝州或議招  
降若訥言河朔重兵所積今釋不討後且啓亂階卒平  
之以工部侍郎叅知政事爲樞密使凡內降恩多覆奏  
不行入內都知王守忠欲得節度使固執以爲不可皇  
祐五年罷爲觀文殿學士兼翰林侍讀學士尚書左丞  
同羣牧制置使判尚書都省卒贈右僕射諡文莊若訥  
彊學善記自奏漢以來諸傳記無不該通尤喜申韓管  
子書頗明歷學因母病遂兼通醫書雖國醫皆屈服張  
仲景傷寒論訣孫思邈方書及外臺秘要久不傳悉考  
器悉見施用有集二十卷

太原府志

卷三十五

人物

五

校訛謬行之名醫多出衛州皆本高氏學皇祐中以漢  
貨泉度一寸依隋書定尺十五種上之并損益祠祭服  
范雍字伯純世家太原曾祖仁恕蜀宰相祖從龜刑部侍  
郎入朝改右屯衛將軍僑河南雍中進士第累官太常  
博士寇準辟河南通判還判三司開拆司河決滑州選  
爲京東轉運副使歷環原州安撫使建言屬羗罰羊舊  
輸錢而比年責使出羊羗人頗患之請輸錢如舊罪輕  
者以漢法贖金從之遷右諫議大夫權三司使論平滑  
州水患勞加龍圖閣直學士明年拜樞密副使母憂起  
遷給事中王清昭應呂災雍抗言小殿僅存不若悉燔  
之如囚其所存又將梧葺之則民不堪命非所以畏天



戒也遂詔勿葺出知陝州改永興軍關中饑疫甚雍爲賑恤知河陽徙應天府又改河南府進資政殿學士陳安邊六事請天雄軍聚甲兵以備河北永興軍河中府益募土兵以備陝西卽涇原環慶有警河中援之旣而元昊拒命拜振武軍節度使知延州請益師不報元昊先遣人通款雍信之一日破金明砦乘勝至城下劉平石元孫皆戰沒雍閉門堅守會大雪賊解去左遷戶部侍郎知安州復知永興軍兼轉運司事初完永興城或言其非便詔止其役雍匿詔而趨成之明年賊犯定州永興獨不憂寇復徙河南府遷禮部尚書卒贈太子太師謚忠獻雍爲治尚恕喜薦士後多至公卿者狄青爲小校時坐法當斬雍貸之子宗傑兵部員外郎直史館

太原府志

卷三十五 人物

七

歷陝西轉運使宗傑子子奇

范子奇字中濟雍孫以蔭歷簽書并州判官以唐介薦神宗賜對提舉修在京倉三司使又薦按覆營繕匠吏積爲欺隱懼罪造飛語間之神宗遣大閹張茂則察其無私勞之曰爲吏當如是無恤人言判將作監使於遼導者改路回遠子奇謂曰此去雲中有直道旬日可至何爲出此導者又欲沮子奇下馬館門外子奇曰異時於中門下馬今何以輒易導者計屈歷河東陝西河北京東四路轉運使加直龍圖閣使河北奏罷諸郡權鹽權戶部侍郎刪酒戶苛禁及奴婢告主給賞法出知慶州廣儲蓄繕城柵嚴守備羈黠羌推誠待下人樂爲用入爲吏部侍郎以待制致仕子世



范坦字伯履以文任歷左司員外郎押伴夏國使應對合  
旨賜進士第權起居舍人使於遼復命具語錄以獻徽  
宗覽而善之付鴻臚令後奉使者視爲式遷殿中監知  
開封府再命使遼時與邊議非時遣使以觀釁坦以不  
宜始禍辭其行徽宗怒責舒州團練副使稍復集賢殿  
修撰知江寧府洪楊二州召爲戶部侍郎論當十及夾  
錫錢之弊以便親請外知河陽入辭徽宗曰夾錫錢之  
之害甚於當十宜速正之爲一道率坦至即奏罷之政  
和初復爲戶部上疏言戶部歲入有限用則無窮今節  
度使八十員畱後至刺史數千員自非軍功得之宜減  
其半奉及他工技末作一切裁損時張商英爲相坦多  
與之合及商英去言者交章論之貶黃州團練使安置

太原府志

卷三十五 人物

七

韶州復徽猷閣待制卒

王信字公亮太原人家故饒財少勇悍大中祥符中盜起  
晉絳澤潞數州信應募籍軍與其徒生擒賊七十人以  
功補龍神衛指揮使部使者表薦累遷龍衛都虞候兼  
鄜延巡檢劉平石元孫戰於三川信以所部兵薄賊斬  
數十級遷西京作坊使知保安軍兼鄜延路兵馬都監  
始至之夕敵衆數萬夜薄城軍吏氣懾信領勁兵二千  
出南門與戰失其前鋒因按軍不動遲明潛上東山整  
軍乘勢而下擊走之遷鈐轄兼經畧安撫招討都監葛  
懷敏敗信出兵拒敵俘斬甚衆進保州刺史就遷馬步  
軍都總管遂爲招討副使徙高陽關路王則反明鑄奏  
爲貝州城下都總管城破則遁執之拜感德軍節度觀



察畱後召爲步軍副都指揮使卒贈武密軍節度兼侍  
中

盧政太原文水人爲神衛都頭從劉平戰延州寇薄西南  
隅兵不得成列政引數騎挑戰發伏弩二百射却之日  
幕政說平日今處山間又逼汧澤宜速退保後山須明  
決鬪不然彼夜出乘高蹙我何以禦之平不聽遂敗政  
脫身歸及黃德和誣平降賊仁宗引政問狀政言平被  
執非降也因自陳失主將當死上義其言赦之以爲供  
奉官德州兵馬監押預討貝州率勇敢數百飛纒絳堞  
而登守者莫能亢大軍乘以入遷內殿承制征儂智高  
有功歷秦鳳高陽關都鈐轄涇原定并代四路副都總  
管累轉黔州觀察使拜武泰軍節度使時年七十三氣  
太原府志

卷三十五 人物

五

貌不衰侍立殿下雖久無惰容能上馬踴躍觀者壯之  
卒贈開府儀同三司

安俊字智用太原人祖贇高州團練使仁宗開資善堂俊  
以將家子謹厚選爲祇候卽位補右班殿直累遷東頭  
供奉官閤門祇候爲環州都監破元昊吃吼并那諸砦  
韓琦上其功遷內殿崇班環慶路都監徙涇原與狄青  
范恪同名使備北邊會葛懷敏敗命爲秦鳳路鈐轄復  
徙涇原條上禦戎十三事歷知忻代州除虢州刺史徙  
高陽關路遷原州刺史知滄涇冀三州秦州築古渭城  
蕃部大擾徙秦鳳路總管歷果州團練使環慶路副總  
管遷陵州防禦使卒贈閬州觀察使俊在邊久羌人識  
之种世衡嘗問降俘若屬於吾將誰畏曰畏安太保指



俊於坐曰此長髯將軍是也

狄棐字輔之唐相仁傑之後徙長沙少以文謁路振振器愛之妻以女舉進士甲科以大理評事知分宜縣歷開封府司錄爲寇準所薦通判益州擢開封府判官歷京西益州路轉運江淮制置發運使累遷太常少卿知廣州加直昭文館代還不以南海物自隨人稱其廉拜右諫議大夫龍圖閣直學士權判吏部流內銓出知滑州進給事中徙天雄軍坐士卒不戢降知隨州徙同州勾當三班院進樞密直學士歷知陝鄭州河中河南府復判流內銓出知揚州未行卒棐在河中有中貴人過郡言將援棐於上前棐答以他語退謂所親曰吾湘潭一寒士今官侍從可以老而自汙耶其爲政愷悌不爲表

太原府志

卷三十五

人物

全

禿卒之日家無餘貲子遵度見文苑

楊察字隱甫其先晉人從唐禧宗入蜀僑成都祖鈞從孟昶歸朝父居簡真宗時都官員外郎宦廬州又僑合肥察幼孤七歲始能言母知書自教之景祐元年舉進士甲科除將作監丞通判宿州遷著作郎直集賢院出知潁壽二州入爲開封推官判三司鹽鐵度支勾院修起居注歷江南東路轉運兼按察使行部數擿奸隱衆皆畏伏尤以舉官爲急務召爲右正言知制誥權判禮部貢院時請罷糊名考士及變文格察奏防禁一瀆則奔兢復起且文無今昔惟以體要爲宗若肆其瀆漫亦非唐氏科選之法議遂寢拜翰林學士權知開封府遷右諫議大夫權御史中丞論事無所避會詔舉御史察言



舉格太密恐英偉之士或有所遺又言高史故事許鳳  
聞縱所言不當繫朝廷采擇近何郊以疑似遽令中書  
詰問臣恐臺諫官畏罪緘默非所以廣言路也又數以  
言事忤宰相陳執中坐失出罷知信州遷禮部侍郎權  
知開封府復兼翰林學士權三司使內侍楊永德毀察  
於帝三司有獄辭連衛士詔移開封鞫之察由是乞罷  
三司遷戶部侍郎兼三學士提舉集禧觀進承旨踰年  
復充三司使察美風儀敏於屬文其爲制誥初若不用  
意及藁成皆雅緻有體當世稱之遇事明決勤於吏職  
雖多益喜不厭癘方作猶入對商畫財利歸而大頓人  
以爲用神太竭卒贈禮部尚書諡宣懿有文集二十卷  
兄子庶嗣

牛拱辰文水人天聖進士歷倅岢嵐定襄遷駕部員外賜  
三品服進虞部郎中知房陵所至去苛細而寬約束清  
心潔已未嘗爲子孫業

丁億嵐縣人天聖朝進士任樞密使恩威並著吏民懷之  
張繼能字守拙并州太原人父贊晉內班繼能性沉密知  
兵喜讀書建隆初以黃門事禁中太平興國中從征河  
東遼入寇命爲高陽鎮定路先鋒都監從崔彥進戰長  
城口多所俘馘明年又與彥進敗遼於唐興口雍熙中  
監李繼隆軍徙護定州屯兵領驍捷卒三千屯五回嶺  
端拱初從趙保忠討李繼遷保忠薦其材命同經畧西  
事淳化三年與白承睿護芻粟入靈武俄爲靈州都監  
城威州清遠軍護其役工畢遷靈環慶清遠軍後陣都



監與西人轉鬪敗走之累遷崇儀使監環十州軍兵馬都監兼巡檢安撫使咸平三年王均之亂命爲川陝兩路招安巡檢使成都平留爲利州招安巡檢復爲邠寧駐泊都監夏人寇清遠坐逗遛長流儋州景德二年赦爲內侍省內常侍累遷廣南東西路安撫副使討陳進賊平授供備庫使東封留爲舊城內巡檢鈐轄加東染院使大中祥符七年爲鄜延都鈐轄先是內屬戶殺漢口者止罰孳畜繼能麗以常法西人不敢犯日課卒截竹爲簽署字其上且言以備將士記殺獲功狀賊聞之甚懼歸朝爲羣牧都監仁宗在儲宮嘗親書一幅賜之繼能以聞真宗亦爲標題其末人以爲榮再爲崇儀使以衰老求解職轉內園使掌瓊林苑卒特贈汀州團練使

鄧守恩并州人十歲以黃門事太宗淳化中從王繼恩討成都盜就護西蜀屯兵咸平初爲鎮定都監入掌騏驎院龍騎卒剽劫環慶遣守恩擒剪之景德初爲澶濮都巡檢又使環慶戒瀘巡察邊事大中祥符初按獄濮州雪寃人十餘輩天禧三年授大內押班爲修滑州決河鈐轄四年春河復故道累遷大內副都知會建天章閣命領其事又勾當資善堂兼春坊司守恩長七尺餘狀貌甚偉蒞事幹敏以彊果稱于時卒贈淄州防禦使



